

御定全唐詩錄

土岐文庫

文庫17

W65

3



全唐詩錄卷第百四

王勃

上海圖書館藏  
民國二十一年十月十四日

010185189193

文庫 17  
W65  
3



御定全唐詩錄卷第四

禮部侍郎臣徐倬翰林院侍讀學士臣徐元正奉

旨校刊

王勃

勃字子安絳州龍門人文中子通孫也六歲解屬  
文與兄勔勳才藻相類杜易簡稱之曰此王氏三  
珠樹也勃年未及冠應舉及第沛王賢聞其名召  
為沛府修撰戲為檄英王雞文高宗覽之怒曰此  
是交構之漸出補虢州參軍父福時坐勃故左遷  
交趾令勃往省父渡南海隋水卒初李敬元稱勃  
與楊炯盧照隣駱賓王必當顯貴裴行儉曰勃等

昭和六年二月一日  
土岐善吉唐氏  
寄贈

雖有才而浮躁淺露豈享爵祿楊稍沈靜應至今  
長餘得令終為幸果如其言  
紀事云勃為文先磨墨數升引被覆面而卧忽起  
書之初不加點時謂腹藁

古體詩

山亭夜宴

桂宇幽襟積松臺涼夜永森沈野逕寒肅穆巖扉靜竹  
晦南阿色荷翻北潭影清興殊未闌林端照初景

詠風

肅肅涼風生加我林壑清驅煙尋磴戶卷霧出山楹去  
來固無跡動息如有情日落山水靜為君起松聲

滕王閣

滕王高閣臨江渚佩玉鳴鸞罷歌舞畫棟朝飛南浦雲  
珠簾暮捲西山雨閒雲潭影日悠悠物換星移幾度秋  
閣中帝子今何在檻外長江空自流

集滕王閣命之序蓋宿命其婿預成將舉屬客  
必讓而及焉勃適至不辭下筆立就未成四韻

勃父為交趾令勃往省父  
道出洪都都督閣伯嶼宴

秋夜長

秋夜長殊未央月明露白澄清光層城綺閣遙相望遙  
相望川無梁北風受節南鴈翔崇蘭委質時菊芳鳴環  
曳珮出長廊為君秋夜擣衣裳織羅對鳳皇丹綺雙鴛  
鴦調砧亂杵思自傷思自傷征夫萬里戍他鄉鶴關音  
信斷龍門道路長君在天一方寒衣徒自香

採蓮曲

採蓮歸綠水芙蓉衣秋風起浪鳧雁飛桂棹蘭橈下長  
浦羅裙玉腕輕搖櫓葉嶼花潭極望平江謳越吹相思  
苦相思苦佳期不可駐塞外征夫猶未還江南採蓮今  
已暮今已暮採蓮花渠今那必盡娼家官道城南把桑  
葉何如江上採蓮花蓮花復蓮花花葉何稠疊葉翠本  
羞眉花紅強似頰佳人不在茲悵望別離時牽花憐共  
蒂折藕愛連絲故情無處所新物徒華滋不惜西津交  
珮解還羞北海雁書遲採蓮歌有節採蓮夜未歇正逢  
浩蕩江上風又值徘徊江上月徘徊蓮浦夜相逢吳姬  
越女何丰茸共問寒光千里外征客關山路幾重

臨高臺

臨高臺高臺迢遞絕浮埃瑤軒綺構何崔嵬鸞歌鳳吹  
清且哀俯瞰長安道萋萋御溝草斜對甘泉路蒼蒼茂  
陵樹高臺四望同帝鄉佳氣鬱葱葱紫閣丹樓紛照耀  
璧房錦殿相玲瓏東迷長樂觀西指未央宮赤城映朝  
日綠樹搖春風旗亭百隊開新市甲第千甍分戚里朱  
輪翠蓋不勝春疊榭層楹相對起復有青樓大道中繡  
戶文窓離綺櫳錦衾夜不褰羅帷晝未空歌屏朝揜翠  
妝鏡晚窺紅為君開寶髻蛾眉罷花叢塵間狹路黯將  
暮雲開月色明如素鴛鴦池上兩兩飛鳳皇樓下雙雙  
度物色正如此佳期那不顧銀鞍繡轂盛繁華可憐今

夜宿娼家娼家少婦不須顰東園桃李片時春君看舊  
日高臺處柏梁銅雀生黃塵

近體詩

銅雀妓

金鳳隣銅雀漳河望鄴城君王無處所臺榭若平生舞  
席紛何就歌梁儼未傾西陵松檟冷誰見綺羅情  
妾本深宮妓層城閉九重君王歡夢盡歌舞為誰容錦  
衾不復襲羅衣誰再縫高臺西北望流涕向青松

聖泉宴

并序

元武山有聖泉焉浸淫歷數百千年乘巖泌湧  
接磴分流下瞰長江沙堤石岸咸古人遺跡也

茲乃青蘋綠芰紫苔蒼蘚遂使江湖思遠寤寐  
寄託既而崇巒左峻石壑前縈丹嶸萬尋碧潭  
千頃松風唱響竹露薰空瀟瀟乎人間之難遇  
也方欲以林壑為天厲琴樽為日用嗟乎古今  
闕方深川上之悲少長同遊且盡山陰之樂  
盍題芳什共寫高情詩得泉字

披襟乘石磴列籀俯春泉蘭氣薰山酌松聲韻野弦影  
飄垂葉外香度落花前興洽林塘晚重巖起夕煙

散關晨度

關山凌旦開石路無塵埃白馬高譚去青牛真氣來重  
門臨巨壑連棟起崇隈卽今揚策度非是棄繻回

別薛華

送送多窮路，遑遑獨問津。悲涼千里道，悽斷百年身。心事同漂泊，生涯共苦辛。無論去與住，俱是夢中人。

麻平晚行

百年懷土望，千里倦遊情。高低尋戍道，遠近聽泉聲。澗葉纔分色，山花不辨名。羈心何處盡，風急暮猿清。

餞韋兵曹

征驂臨野次，別袂慘江垂。川霽浮煙斂，山明落照移。鷹風凋晚葉，蟬露泣秋枝。亭臯分遠望，延想間雲涯。

白下驛餞唐少府

下驛窮交日，昌亭旅食年。相知何用早，懷抱即依然。浦

樓低晚照，鄉路隔風烟。去去如何道，長安在日邊。

杜少府之任蜀州

城闕輔三秦，風煙望五津。與君離別意，同是宦遊人。海內存知己，天涯若比隣。無為在岐路，兒女共霑巾。

仲春郊外

東園垂柳徑，西堰落花津。物色連三月，風光絕四隣。鳥飛村覺曙，魚戲水知春。初晴山院裏，何處染罽塵。

郊興

空園歌獨酌，春日賦閒居。澤蘭侵小徑，河柳覆長渠。雨去花光濕，風歸葉影疎。山人不惜醉，唯畏綠樽虛。

春日還郊

閒情兼默語攜杖赴巖泉草綠縈新帶榆青綴古錢魚  
牀侵岸水鳥路入山煙還題平子賦花樹滿春田

三月曲水宴

彭澤官初去河陽賦始傳田園歸舊國詩酒間長筵列  
室窺丹洞分樓瞰紫烟縈迴亘津渡出沒控郊鄠鳳琴  
調上客龍轡儼羣仙松石偏宜古藤蘿不記年重簷交  
密樹複磴擁危泉抗石晞南嶺乘沙眇北川傳巖來築  
處磻溪入釣前日斜真趣遠幽思夢涼蟬

贈李十四

小徑偏宜草空庭不厭花平生詩與酒自得會仙家  
亂竹開三徑飛花滿四隣從來揚子宅別有尚元人

蜀中九日登元武山旅眺

九月九日望鄉臺他席他鄉送客杯人今已厭南中苦  
鴻雁那從北地來

楊炯

炯華陰人幼聰敏善屬文舉神童為弘文館學士  
累遷詹事司直則天初坐祖弟神讓事左遷梓州  
司法參軍秩滿授盈川令炯與王勃盧照鄰駱賓  
王以詞賦齊名稱為王楊盧駱炯謂人曰吾愧在  
盧前耻居王後張說曰楊盈川文思如懸河注水  
酌之不竭既優於盧亦不減王耻居王後信然愧  
在盧前謙也



古體詩

廣谿峽

廣谿三峽首曠望兼川陸山路遠羊腸江城鎮魚復喬  
林百丈偃飛水千尋瀑驚浪迴高天盤渦轉深谷漢氏  
昔云季中原爭逐鹿天下有英雄襄陽有龍伏常山集  
軍旅永安興版築池臺忽已傾邦家遽淪覆庸才若劉  
禪忠佐為心腹設險猶可存當無賈生哭

巫峽

三峽七百里唯言巫峽長重巖窅不極疊嶂凌蒼蒼絕  
壁橫天險莓苔爛錦章入夜分明見無風波浪狂忠信  
吾所蹈泛舟亦何傷可以涉砥柱可以浮呂梁美人今

何在靈芝徒有芳山空夜猿嘯征客淚霑裳

西陵峽

絕壁聳萬仞長波射千里盤薄荆之門滔滔南國紀楚  
都昔全盛高丘烜望祀秦兵一旦侵夷陵火潛起四維  
不復設關塞良難恃洞庭且忽焉孟門終已矣自古天  
地闢流為峽中水行旅相贈言風濤無極已及余踐斯  
地瓌奇信為美江山若有靈千載伸知己

近體詩

從軍行

烽火照西京心中自不平牙璋辭鳳闕鐵騎繞龍城雪  
暗凋旗畫風多雜鼓聲寧為百夫長勝作一書生

劉生

卿家本六郡年長入三秦白璧酬知己黃金謝主人  
劍鋒生赤電馬足起紅塵日暮歌鐘發喧喧動四鄰

驄馬

驄馬鐵連錢長安俠少年帝畿平若水官路直如弦  
夜玉粧車軸秋金鑄馬鞭風霜但自保窮達任皇天

出塞

塞外欲紛紛雌雄猶未分明堂占氣色華蓋辨星文  
二月河魁將三千太乙軍丈夫皆有志會見立功勳

有所思

賤妾留南楚征夫向北燕三秋方一日少別比千年不

掩頰紅縷無論數綠錢相思明月夜迢遞白雲天

梅花落

窓外一株梅寒花五出開影隨朝日遠香逐便風來  
泣對銅鈎障愁看玉鏡臺行人斷消息春恨幾徘徊

送臨津房少府

岐路三秋別江津萬里長煙霞駐征蓋弦奏促飛觴  
階樹含斜日池風泛早涼贈言未終竟流涕忽霑裳

送豐城王少府

愁結亂如麻長天照落霞離亭隱喬樹溝水浸平沙  
左尉才何屈東關望漸賒行看轉牛斗持此報張華

遊廢觀

青嶂倚丹田荒涼數百年猶知小山桂尚識大羅天  
藥敗金爐火苔昏玉女泉歲時無壁畫朝夕有階烟  
花柳三春節江山四望懸悠然出塵網從此狎神仙

和劉侍郎入隆唐觀

福地陰陽合仙都日月開山川臨四險城樹隱三臺  
伏檻排雲出飛軒遶澗迴參差凌倒影瀟灑軼浮埃  
百果珠為實群峰錦作苔懸蘿暗疑霧瀑布響成雷  
方士燒丹液真人泛玉杯還如問桃水更似得蓬萊  
漢帝求仙日相如作賦才自然金石奏何必上天台

和輔先入昊天觀

遁甲爰皇里星占太乙宮天門開奕奕佳氣鬱葱葱  
碧

落三乾外黃圖四海中邑居環弱水城闕抵新豐  
玉檻崑崙側金樞地軸東上真朝北斗元始詠南風  
漢君祠五帝淮王禮八公道書編竹簡靈液灌梧桐  
草茂瓊階綠花繁寶樹紅石樓紛似畫地鏡淼如空  
桑海年應積桃源路不窮黃軒若有問三月住崆峒

送劉校書從軍

天將下三宮星門召五戎坐謀咨廟畧飛檄佇文雄  
赤土流星劔烏號明月弓秋陰生蜀道殺氣繞湟中  
風雨何年別琴尊此日同離亭不可望溝水自西東

夜送趙縱

趙氏連城壁由來天下傳送君還舊府明月滿前川

盧照鄰

照鄰字昇之范陽人博學善屬文初授鄧王府典籤王甚愛之謂人曰此吾之相如也後拜新都尉因染風疾去官處太白山中以服餌為事後疾轉篤徙居具茨山沈痼攣廢不堪其苦與親友執別投潁水卒

紀事云照隣居具茨山下自以為高宗尚吏已獨儒武后尚法已獨黃老后封嵩山屢聘賢士已獨廢著五悲以自明

古體詩

詠史

季生昔未達身辱功不成髡鉗為臺隸灌園變姓名幸逢滕將軍兼遇曹丘生漢祖廣招納一朝拜公卿百金孰云重一諾良匪輕廷議斬樊噲群公寂無聲處身孤且直遭時坦而平丈夫當如此唯唯何足榮

大漢昔云季小人道遂振玉帛委奄尹斧鑕嬰縉紳邈哉郭先生卷舒得其真雍容謝朝廷談笑獎人倫在晦不絕俗處亂不為親諸侯不得友天子不得臣冲情甄負甌重價折角巾悠悠天下士相送洛橋津誰知仙舟上寂寂無四隣

昔有平陵男姓朱名阿游直髮上衝冠壯氣橫三秋願得斬馬劍先斷佞臣頭天子玉檻折將軍丹血流捐生

不肯拜視死其若休歸來教鄉里童蒙遠相求弟子數  
百人散在十二州三公不敢吏五鹿何能酬名與日月  
懸義與天壤儔何必疲執戟區區在封侯偉哉曠達士  
知命固不憂

結客少年場行

長安重遊俠洛陽富才雄玉劔浮雲騎金鞭明月弓鬪  
雞過渭北走馬向關東孫賓遙見待郭解暗相通不受  
千金爵誰論萬里功將軍下天上寇騎入雲中烽火夜  
似月兵氣曉成虹橫行狗知已負羽遠從戎龍旌昏朔  
霧鳥陣捲胡風追奔瀚海咽戰罷陰山空歸來謝天子  
何如馬上翁

早度分水嶺

丁年遊蜀道斑鬢向長安徒費周王粟空彈漢吏冠馬  
蹄穿欲盡貂裘敝轉寒層冰橫九折積石凌七盤重谿  
既下漱峻峯亦上千隴頭聞戍鼓嶺外咽飛湍瑟瑟松  
風急蒼蒼山月團傳語後來者斯路誠獨難

三月曲水宴

得樽字

風烟彭澤里山水仲長園由來棄銅墨本自重琴樽高  
情邈不嗣雅道今復存有美光時彥養德坐山樊門開  
芳杜逕室距桃花源公子黃金勒仙人紫氣軒長懷去  
城市高詠狎蘭蓀連沙飛白鷺孤嶼嘯元猿日影巖前  
落雲花江上翻興闌車馬散林塘夕鳥喧

奉使益州至長安發鍾陽驛

躋險方未夷乘春聊騁望落花赴丹谷奔流下青嶂  
蕤曉樹滋滉漾春江漲平川看釣侶狹逕聞樵唱蝶戲  
綠苔前鶯歌白雲上耳目多異賞風烟有奇狀峻阻埒  
長城高標吞巨舫聯翩事羈勒辛苦勞疲恙夕濟幾潺  
湲晨登每惆悵誰念復芻狗山河獨偏喪

於時春也慨然有江湖之思寄贈柳九隴

提琴一萬里負書三十年晨攀偃蹇樹暮宿清泠泉翔  
禽鳴我側旅獸過我前無人且無事獨酌還獨眠遙聞  
彭澤宰高弄武城絃形骸寄文墨意氣託神仙我有壺  
中要題為物外篇將以貽好道道遠莫致旃相思勞日

夜相望阻風烟坐惜春華晚徒令客思懸水去東南地  
氣凝西北天關山悲蜀道花鳥憶秦川天子何時問公  
卿本亦憐自哀還自樂歸藪復歸田海屋銀為棟雲車  
電作鞭倘遇鸞將鶴誰論貂與蟬萊洲頻度淺桃實幾  
成圓寄言飛鳧鳥歲晏共聯翩

長安古意

長安大道連狹斜青牛白馬七香車玉輦縱橫過主第  
金鞭絡繹向侯家龍銜寶蓋承朝日鳳吐流蘇帶晚霞  
百丈遊絲爭繞樹一群嬌鳥共啼花啼花戲蝶千門側  
碧樹銀臺萬種色複道交牕作合歡雙闕連甍垂鳳翼  
梁家畫閣天中起漢帝金莖雲外直樓前相望不相知

陌上相逢詎相識借問吹簫向紫煙曾經學舞度芳年  
得成比目何辭死願作鴛鴦不羨仙比目鴛鴦真可羨  
雙去雙來君不見生憎帳額繡孤鸞好取門簾帖雙燕  
雙燕雙飛繞畫梁羅幃翠被鬱金香片片行雲著蟬鬢  
纖纖初月上鴉黃鴉黃粉白車中出含嬌含態情非一  
妖童寶馬鐵連錢娼婦盤龍金屈膝御史府中烏夜啼  
廷尉門前雀欲棲隱隱朱城臨玉道遥遥翠幃沒金堤  
挾彈飛鷹杜陵北揆九借客渭橋西俱邀俠客芙蓉劍  
共宿娼家桃李蹊娼家日暮紫羅裙清歌一轉口氛氲  
北堂夜夜人如月南陌朝朝騎似雲南陌北堂連北里  
五劇三條控三市弱柳青槐拂地垂佳氣紅塵暗天起

漢代金吾千騎來翡翠屠蘇鸚鵡杯羅襦寶帶為君解  
燕歌趙舞為君開別有豪華稱將相轉日回天不相讓  
意氣由來排灌夫專權判不容蕭相專權意氣本豪雄  
青虬紫燕坐春風自言歌舞長千載自謂驕奢凌五公  
節物風光不相待桑田碧海須臾改昔時金階白玉堂  
即今惟見青松在寂寂寥寥楊子居年年歲歲一牀書  
獨有南山桂花發飛來飛去襲人裾

近體詩

巫山高

巫山望不極望望下朝氛莫辨啼猿樹徒看神女雲驚  
濤亂水脈驟雨暗峯文霑裳即此地况復遠思君

芳樹

芳樹本多奇年華復在斯結翠成新幄開紅滿故枝風  
歸花歷亂日度影參差容色朝朝落思君君不知

王昭君

合殿恩中絕交河使漸稀肝腸隨玉輦形影向金微漢  
地草應綠胡庭沙正飛願逐三秋鴈年年一度歸

上之回

回中道路險蕭關烽候多五營屯北地萬乘出西河單  
于拜玉璽天子按雕戈振旅汾川曲秋風橫大歌

春晚山莊

顧步三春晚田園四望通遊絲橫惹樹戲蝶亂依叢竹

懶偏宜水花狂不待風唯餘詩酒意當了一生中  
田家無四隣獨坐一園春鶯啼非選樹魚戲不驚綸山  
水彈琴盡風花酌酒頻年華已可樂高興復留人

元日述懷

筮仕無中秩歸耕有外臣人歌小歲酒花舞大唐春草  
色迷三徑風光動四隣願得長如此年年物候新

西使兼送孟學士南遊

地道巴陵北天山弱水東相看萬餘里共倚一征蓬零  
雨悲王粲清樽別孔融徘徊聞夜鶴悵望待秋鴻骨肉  
胡秦外風塵關塞中唯餘劍鋒在耿耿氣成虹

送鄭司倉入蜀



離人丹水北遊客錦城東別意還無已離憂自不窮隴  
雲朝結陣江月夜臨空關塞疲征馬霜氛落早鴻潘年  
三十外蜀道五千中送君秋水曲酌酒對秋風

羈卧山中

卧壑迷時代行歌任死生紅顏意氣盡白璧故交輕澗  
戶無人跡山窓聽鳥聲春色緣巖上寒光入溜平雪盡  
松帷暗雲開石路明夜伴饑鼯宿朝隨馴雉行度谿猶  
憶處尋洞不知名紫書常日閱丹藥幾年成扣鐘鳴天  
鼓燒香厭地精倘遇浮丘鶴飄飄凌太清

送幽州陳參軍赴任寄呈鄉曲父老

薊北三千里關西二十年馮唐猶在漢樂毅不歸燕人

同黃鶴遠鄉共白雲連郭隗池臺處昭王樽酒前故人  
當已老舊壑幾成田紅顏如昨日衰鬢似秋天西蜀橋  
應毀東周石尚全灞池水猶綠榆關月早圓塞雲初上  
雁庭樹欲銷蟬送君之舊國揮淚獨潛然

駱賓王

賓王義烏人少善屬文尤妙於五言詩嘗作帝京  
篇當時以為絕唱然落魄無行好與博徒遊高宗  
末為長安主簿坐贓左遷臨海丞怏怏失志棄官  
去後與徐敬業舉兵

紀事云徐敬業舉兵揚州以賓王為府屬代敬業  
為檄武后讀至一坏之土未乾六尺之孤安在矍

然曰誰為之或以賓王對后曰宰相安得失此人  
敬業敗亡命不知所終中宗時詔求其文得數百  
篇

古體詩

帝京篇

山河千里國城闕九重門不覩皇居壯安知天子尊皇  
居帝里峻函谷鷄野龍山侯甸服五緯連影集星躔八  
水分流橫地軸秦塞重關一百二漢家離宮三十六桂  
殿欽峯對玉樓椒房窈窕連金屋三條九陌麗城隈萬  
戶千門平旦開復道斜通鳩鵲觀交衢直指鳳皇臺劍  
履南宮入簪纓北闕來聲明冠寰宇文物象昭回鈎陳

肅蘭祀璧沼浮槐市銅羽應風迴金莖承露起校文天  
祿閣習戰昆明水朱邸抗平臺黃扉通戚里平臺戚里  
帶崇墉炊金饌玉待鳴鐘小堂綺帳三千戶大道青樓  
十二重寶蓋雕鞍金絡馬蘭窗繡柱玉盤龍繡柱璇題  
粉壁映鏘金鳴玉王侯盛王侯貴人多近臣朝遊北里  
暮南隣陸賈分金將讌喜陳遵投轄正留賓趙李經過  
密蕭朱交結親丹鳳朱城白日暮青牛紺幘紅塵度俠  
客珠彈垂楊道倡婦銀鈎采桑路倡家桃李自芳菲京  
華遊俠盛輕肥延年女弟雙飛入羅敷使君千騎歸同  
心結縷帶連理織成衣春朝桂樽樽百味秋夜蘭燈燈  
九微翠幌珠簾不獨映清歌寶瑟自相依且論三萬六

千是寧知四十九年非古來榮利若浮雲人生倚伏信  
難分始見田竇相傾奪俄聞衛霍有功勲未厭金陵氣  
先開石槨文朱門無復張公子灞亭誰畏李將軍相顧  
百齡皆有待居然萬化咸應改桂枝芳氣已銷亡栢梁  
高宴今何在春去春來苦自馳爭名爭利徒爾為久畱  
郎署終難遇空掃相門誰見知當時一旦擅豪華自言  
千載長驕奢倏忽搏風生羽翼須臾失浪委泥沙黃雀  
徒巢桂青門遂種瓜黃金銷鑠素絲變一貴一賤交情  
見紅顏宿昔白頭新脫粟布衣輕故人故人有湮淪新  
知無意氣灰死韓安國羅傷翟廷尉已矣哉歸去來馬  
卿辭蜀多文藻揚雄仕漢乏良媒三冬自矜誠足用十

年不調幾遭迴汲黯薪逾積孫弘閣未開誰惜長沙傅

獨負洛陽才

紀事云揚盈川之為文好以古人性名連用號為點鬼簿賓王  
好以數對如秦地重關一百二漢家離宮三十六人號為算博

士又曰倏忽搏風生羽翼須臾失浪委泥沙賓  
王後與徐敬業興兵揚州大敗逃死此其讖也

軍中行路難 同辛常伯作

君不見玉關塵色暗邊庭銅鞮雜虜寇長城天子按劍  
徵餘勇將軍受賑事橫行七德龍韜開玉帳千重龜壘  
動金鉦陰山苦霧埋高壘交河孤月照連營連營去去  
無窮極擁旆遙遙過絕國陣雲朝結晦天山寒沙夕漲  
迷疎勒龍鱗水上開魚貫馬首山前振鷗翼長驅萬里  
讜祁連分麾三令武功宣百發烏號遙碎柳七尺龍文  
迴照蓮春來秋去移灰瑄蘭閨柳市芳塵斷雁門迢遞

尺書稀鴛被相思雙帶緩行路難行路難誓令氛祲靜  
臯蘭但使封侯龍額貴詎隨中婦鳳樓寒

疇昔篇

少年重英俠弱歲賤衣冠既託寰中賞方承膝下歡  
遊灞水曲風月洛城端且知無玉饌誰肯逐金丸  
玉饌盛繁華自言輕侮季倫家九陌爭馳千里馬三條  
競驚七香車掩映飛軒乘落照參差步障引朝霞池中  
舊水如懸鏡屋裏新妝不讓花意氣風雲倏如昨歲月  
春秋屢迴薄上苑頻經柳絮飛中園幾見梅花落當時  
門客今何在疇昔交朋已疎索莫教憔悴損容儀會得  
高秋雲霧廓淹留坐帝鄉無事積炎涼一朝披短褐六

載奉長廊賦文慙昔馬執戟歎前揚揮戈出武帳荷筆  
入文昌文昌隱隱皇城裏由來奕奕多才子潘陸詞鋒  
絡繹飛張曹翰苑縱橫起卿相未曾識王侯寧見擬垂  
釣甘成白首翁負薪何處逢知己判將運命賦窮通從  
來奇舛任西東不應永棄同芻狗且復飄飄類轉蓬容  
鬢年年異春華歲歲同榮親未盡禮狗主欲申功脂車  
秣馬辭鄉國縈轡西南使邛犍玉壘銅梁不易攀地角  
天涯眇難測鶯轉蟬吟有悲望鴻來雁度無音息陽關  
積霧萬里昏劍閣連山千種色蜀路何悠悠岷峯阻且  
修迴腸隨九折迸淚下雙流寒光千里暮露氣二江秋  
長途看束馬平水且沈牛華陽舊地標神制石鏡蛾眉

真秀麗諸葛才雄已號龍公孫躍馬輕稱帝五丁卓犖  
多奇力四士英靈富文藝雲氣橫開八陣形橋影遙分  
七星勢川平烟霧開遊戲錦城隈墉高龜望出水淨雁  
文迴尋姝入酒肆訪客上琴臺不識金貂重偏惜玉山  
頽他鄉冉冉消年月帝里沈沈限城闕不見猿聲助客  
啼惟聞旅思將花發我家迢遞關山裏關山迢遞不可  
越故園梅柳尚有餘春來勿使芳菲歇解鞅欲言歸執  
袂愴多違北梁俱握手南浦共沾衣別情傷去蓋離念  
惜徂輝知音何所託木落雁南飛回來望平陸春來酒  
應熟相將菌閣卧青溪且用藤盃泛黃菊十年不調為  
貧賤百日屢遷隨倚伏祗為須求負郭田使我再干州

縣祿百年鬱鬱少騰遷萬里遙遙入鏡川吳江沸潮衝  
白日淮海長波接遠天叢竹凝朝露孤山起暝煙賴有  
邊城月常伴客旌懸東南美箭稱吳會名都隱軫三江  
外塗山執玉應昌期曲水開襟重文會仙鏞流音鳴鶴  
嶺寶劍分輝落蛟瀨未看白馬對蘆芻且覺浮雲似車  
蓋江南節序多文酒屢經過共踏春江曲俱唱采菱歌  
舟移疑入鏡棹舉若乘波風光無限極歸檝礙池荷眺  
聽烟霞正流盼即從王事歸艫轉芝田花月屢徘徊金  
谷佳期重遊衍登高北望嗤梁叟憑軾西征想潘掾峯  
開華岳聳疑蓮水激龍門急如箭人事謝光陰俄遭霜  
露侵偷存七尺影分沒九泉深窮途行泣玉憤路未藏

金茹荼空有歎懷橘獨傷心年來歲去成銷鑠懷抱心  
期漸寥落掛冠裂冕已辭榮南畝東臯事耕鑿賓階客  
院常疎散蓬徑柴扉終寂寞自有林泉堪隱棲何必山  
中事丘壑我住青門外家臨素滙濱遥瞻丹鳳闕斜望  
黑龍津荒衢通獵騎窮巷抵樵輪時有桃源客來訪竹  
林人昨夜琴聲奏悲調旭旦含顰不成笑果乘驄馬發  
囂書復道郎官稟綸誥治長非罪曾縲絊長孺然灰也  
經溺高門有閣不圖封峻筆無聞斂敷妙適離京兆謫  
還從御史彈炎威資夏景平曲况秋翰畫地終難入書  
空自不安吹毛未可待搖尾且求食丈夫坎壈多愁疾  
契濶迤邐盡今日慎罰寧憑兩造辭嚴科直掛三章律

鄒衍銜悲衝燕獄李斯抱怨拘秦桎不應白髮頓成絲  
直為黃沙暗如漆紫禁終難叫朱門不易排驚魂聞葉  
落危魄逐輪埋霜威遥有厲雪枉更無階含冤欲誰道  
飲氣獨居懷忽聞驛使發關東傳道天波萬里通涸鱗  
去轍還遊海幽禽釋網便翔空舜澤堯曦方有極讒言  
巧佞儻無窮誰能跼蹐依三輔會就商山訪四翁

近體詩

遊靈公觀

靈峯標勝境神府枕通川玉殿斜連漢金堂迴架烟斷  
風疎晚竹流水切寒弦別有青門外空懷元圃仙

陪潤州薛司空丹徒桂明府遊招隱寺

全唐詩金卷四  
共尋招隱寺初識戴顓家還依舊泉壑應改昔雲霞綠  
竹寒天笋紅蕉臘月花金繩倘畱客為繫日光斜

同辛簿簡仰酬思元上人林泉

聞君招隱地髣髴武陵春緝芰知還楚披榛似避秦崩  
查年祀積幽草歲時新一謝滄浪水安知有逸人  
俗遠風塵隔春還初服遲林疑中散地人似上皇時芳  
杜湘君曲幽蘭楚客詞山中有春草長似寄相思

在兗州餞宋五之問

淮沂泗水地梁甫汶陽東別路青驪遠離樽綠蟻空枰  
寒凋密翠棠晚落疎紅別後相思曲悽斷入琴風

在獄詠蟬

并序

余禁所禁垣西是法廳事也有古槐數株焉雖  
生意可知同殷仲文之古樹聽訟斯在卽周召  
伯之甘棠每至夕照低陰秋蟬疎引發聲幽息  
有切常聞豈人心異於曩時將蟲響悲於前聽  
嗟乎聲以動容德以象賢故潔其身也稟君子  
達人之高行蛻其皮也有仙都羽化之靈姿候  
時而來順陰陽之數應節為變審藏用之機有  
目斯開不以道昏而昧其視有翼自薄不以俗  
厚而易其真吟喬樹之微風韻姿天縱飲高秋  
之墜露清畏人知僕失路艱虞遭時徽纆不衰  
傷而自怨未搖落而先衰聞蟋蟀之流聲悞平

反之一已奏見蟾蜍之抱影怯危機之未安感而  
綴詩貽諸知己庶情沿物應哀弱羽之飄零道  
寄人知憫餘聲之寂寞非謂文墨取代幽憂云  
爾  
西陸蟬聲唱南冠客思侵那堪元髻影來對白頭吟露  
重飛難進風多響易沈無人信高潔誰謂表予心

樂大夫挽詞

可嘆浮生促吁嗟此路難丘陵一起恨言笑幾時歡蕭  
索郊埏晚荒涼井徑寒誰當門下客獨見有任安  
蒿里誰家地松門何代丘百年三萬日一別幾千秋返  
照寒無影窮泉凍不流居然同物化何處欲藏舟

一旦先朝菌千秋掩夜臺青鳥新兆去白馬故人來草  
露當春泣松風向暮哀寧知荒壠外弔鶴自徘徊

棹歌行

寫月圖黃罷凌波拾翠通鏡花搖芰日衣麝入荷風葉  
密舟難蕩蓮疎浦易空鳳媒羞自託鴛翼恨難窮秋帳  
燈光翠娼樓粉色紅相思無別曲併在棹歌中

夕次蒲類津

二庭歸望斷萬里客心愁山路猶南屬河源自北流晚  
風連朔氣新月照邊秋竈火通軍壁烽烟上戍樓龍庭  
但苦戰燕領會封侯莫作蘭山下空令漢國羞

在軍中贈先還知己



蓬轉俱行役，瓜時獨未還。魂迷金闕路，望斷玉門關。獻  
凱多慙霍，論封幾謝班。風塵催白首，歲月損容顏。落雁  
低秋塞，驚鳧起暝灣。胡霜如劔鏑，漢月似刀鐮。別後邊  
庭樹，相思幾度攀。

浮槎

并序

遊目川上，觀一浮槎泛泛然，若木偶之乘流，迷  
不知其所適也。觀其根柢盤屈，枝幹扶疎，大則  
有棟梁舟楫之材，小則有輪轅棹楫之用，非夫  
稟乾坤之秀氣，含宇宙之淳精，孰能負凌雲槩  
日之姿，抱積雪封霜之骨，向使懷材幽藪，藏穎  
重巖，絕望於巖廊之榮，遺形於斤斧之患，固可

垂蔭萬畝，懸暎九霄，與建木較其短長，將大椿  
齊其年壽者，而委根險岸，託質畏途，上為疾風  
衝颺，所摧殘下為奔浪迅波，所激射，基由壤括  
勢以地危，豈盛衰之理繫乎？時封植之道存乎？  
我一墜泉谷，萬里飄淪，與波浮沈，隨時逝止，雖  
殷仲文嘆生意已盡，孔宣父知朽質難雕，然而  
遇良工逢仙客，牛礪可託，玉璜之路非遥，匠石  
先談萬乘之器，何遠故材之用與？不用時也悲  
夫，然知萬物之相感應者，亦奚必同聲同氣而  
已哉？感而賦詩，貽諸同疾云爾。

昔負千尋質，高臨九仞峯。貞心凌晚桂，勁節掩寒松。忽

值風飈折坐為波浪衝摧殘空有恨擁腫遂無庸渤海  
三千里泥沙幾萬重似舟飄不定如梗泛何從仙客終  
難託良工豈易逢徒懷萬乘器誰為一先容

邊城落日

紫塞流沙北黃圖灞水東一朝辭俎豆萬里逐沙蓬候  
月恒持滿尋源屢鑿空野昏邊氣合烽迴戍烟通膂力  
風塵倦疆場歲月窮河流控積石山路遠崆峒壯志凌  
蒼兕精誠貫白虹君恩如可報龍劍有雌雄

宿溫城望軍營

北地寒膠折邊城夜柝聞兵符關帝闕天策動將軍塞  
靜胡笳徹沙明楚練分風旗翻翼影霜劍轉龍文白羽

搖如月青山斷若雲烟疎疑卷幔塵滅似銷氛投筆懷  
班業臨戎想顧勳還應雪漢耻持此報明君

久戍邊城有懷京邑

擾擾風塵地皇皇名利途盈虛一易舛心迹兩難俱弱  
齡小山志寧期大丈夫九微先賁玉千仞忽彈珠棘寺  
遊三禮蓬山筮八儒懷鉛慙後進投筆願前驅北走非  
通趙西之似化胡錦車朝促候刁斗夜傳呼戰士青絲  
絡將軍黃石符連星入寶劍半月上雕弧拜井開疎勒  
鳴桴動密須戎機習短蔗祆祲靜長榆季月炎初盡邊  
亭草早枯層陰籠古木窮色變寒蕪海鶴聲嘹唳城烏  
尾畢逋葭繁秋引色桂滿夕輪虛行役風霜久鄉園夢

想孤灞池遥夏國秦海望陽紆沙塞三千里京城十二  
衢楊溝連鳳闕槐路擬鴻都璧殿規宸象金隄法斗樞  
雲浮西北蓋月照東南隅寶帳垂連理銀床轉轆轤廣  
筵留上客豐饌引中廚漏緩金徒箭嬌繁玉女壺秋濤  
飛喻馬春水泛仙艫意氣風雲合言忘道術趨共矜名  
已泰詎宥沫相濡有志慙雕朽無庸類散樗關山暫超  
忽形影歎艱虞結網空知羨圖榮豈自誣忘情同塞馬  
比德類宛駒隴阪肝腸絕陽關亭堠迂迷魂驚落雁離  
恨斷飛鳧春去榮華盡年來歲月無邊愁傷郢調鄉思  
繞吳歛河氣通中國山途限外區相思若可寄冰泮有  
銜蘆

於易水送人

此地別燕丹壯髮上衝冠昔時人已沒今日水猶寒

御定全唐詩錄卷第四

御定全唐詩錄卷第五

禮部侍郎臣徐倬翰林院侍讀學士徐元正奉

旨校刊

陳子昂

子昂字伯玉射洪人家世豪富子昂獨苦節讀書  
金華山善屬文舉進士拜麟臺正字轉右拾遺數  
上疏陳事詞皆典美武攸宜統軍北討契丹以子  
昂為管記聖曆初解官歸為縣令段簡因事收繫  
憂憤卒子昂褊躁無威儀然文詞宏麗當時重之  
紀事云子昂與趙貞固盧藏用杜審言宋之問畢  
隆澤郭襲微司馬承禎釋懷一陸餘慶號方外十

陳子昂

全唐詩錄卷第五

御定全唐詩錄

五

友

盧黃門云陳拾遺橫制頽波天下質文翕然一變  
獨異記云子昂初入京不為人知有賣胡琴者價  
百萬子昂突出謂左右曰輦千緡市之衆驚問答  
曰余善此樂皆曰可得聞乎曰明日可集宣陽里  
如期皆往則酒肴畢具捧琴語曰蜀人陳子昂有  
文百軸不為人知此樂賤工之役豈宜畱心舉而  
碎之以其文百軸徧贈會者一日之內聲華溢都  
朱晦庵曰予讀陳子昂感遇詩愛其詞旨幽邃音  
節豪宕非當世詞人所及如丹砂空青金膏水碧  
雖近乏世用而實物外難得自然之奇寶然亦恨

其不精於理而自託於仙佛之間以為高也

劉後村曰唐初王楊沈宋擅名然不脫齊梁之體  
獨陳拾遺首倡高雅冲澹之音一掃六代之纖弱  
超於黃初建安矣太白韋柳繼出皆自子昂發之  
及觀感遇詩數篇皆蟬脫翰墨畦逕讀之使人有  
眼空四海神遊八極之興也

僧皎然云子昂感遇三十首出自阮公詠懷詠懷  
之作難以為儔

高棟云唐興文章承陳隋之弊子昂始變雅正負  
然獨立超邁時髦初為感遇詩王適見之曰是必  
為海內文宗噫公之高才個儻樂交好施學不為

儒務求真遠文不按古佇興而成觀其音響冲和  
詞旨幽邃渾渾然有平大之意若公輸氏當巧而  
不用者也故能掩王盧之靡韻抑沈宋之新聲繼  
往開來中流砥柱上遏貞觀之微波下決開元之  
正派嗚呼盛哉

古體詩

感遇詩

微月生西海幽陽始代昇圓光正東滿陰魄已朝凝太  
極生天地三元更廢興至精諒斯在三五誰能徵

三五出史記至

道不遠三五必返

蘭若生春夏芊蔚何青青幽獨空林色朱蕤冒紫莖遲

遲白日晚嫋嫋秋風生歲華盡搖落芳意竟何成  
樂羊為魏將食子殉軍功骨肉且相薄他人安得忠吾  
聞中山相乃屬放麋翁孤獸猶不忍况以奉君終  
市人矜巧智於道重童蒙傾奪相夸侈不知身所終曷  
見元真子觀世玉壺中窅然遺天地乘化入無窮  
吾觀龍變化乃知至陽精石林何冥密幽洞無留行古  
之得仙道信與元化并元感非象識誰能測淪冥世人  
拘目見酣酒笑丹經崑崙有瑤樹安得采其英  
白日每不歸青陽時暮矣茫茫吾何思林卧觀無始衆  
芳委時晦鶻鳩悲鳴耳鴻荒古已頽誰識巢居子  
吾觀崑崙化日月淪洞冥精魄相交會天壤以羅生仲

尼推太極老聃貴窈冥西方金仙子崇議乃無明空色  
皆寂滅緣業定何成名教信紛藉死生俱未停  
聖人秘元命懼世亂其真如何嵩公輩詆譎誤時人先  
天誠為美階亂禍誰因長城備邊寇羸禍發其親赤精  
既迷漢子年何救秦去去桃李花多言死如麻  
淡居觀群動怩然爭朶頤讒說相啖食利害紛凝凝便  
便夸毗子榮耀更相持務光讓天下商賈競刀錐已矣  
行采芝萬世同一時  
吾愛鬼谷子青谿無垢氛囊括經世道遺身在白雲七  
雄方龍鬪天下亂無君浮榮不足貴遵養晦時文舒可  
彌宇宙卷之不盈分豈徒山木壽空與麋鹿群

吻吻南山鹿罹罟以媒和招搖青桂樹幽蠹亦成科世  
情甘近習榮耀紛如何怨憎未相復親愛生禍羅瑤臺  
傾巧笑玉杯殞雙蛾誰見枯城蘖青青成斧柯  
林居病時久水木澹孤清閒卧觀物化悠悠念無生青  
春始萌達朱火已滿盈徂落方自此感嘆何時平  
臨岐泣世道天命良悠悠昔日殷王子玉馬遂朝周寶  
鼎淪伊穀瑤臺成古丘西山傷遺老東陵有故侯  
貴人難得意賞夢在須臾莫以心如玉探他明月珠昔  
稱天桃子今為春市徒鴟鴞悲東國麋鹿泣姑蘇誰見  
鷗夷子扁舟去五湖  
聖人去已久公道緬良難蚩蚩夸毗子堯禹以為謾驕

榮貴工巧勢利遞相干燕王尊樂毅分國願同歡魯連  
讓齊爵遺組去邯鄲伊人信往矣感激為誰歎

幽居觀大運悠悠念羣生終古代興沒豪聖莫能爭三  
季淪周赧七雄滅秦嬴復聞赤精子提劍入咸京炎光  
既無象晉虜復縱橫堯禹道已昧昏虐勢方行豈無當  
世雄天道與胡兵咄咄安可言時醉而未醒仲尼溺東  
魯伯陽遁西溟大運自古來旅人胡歎哉

逶迤勢已久骨鯁道斯窮豈無感激者時俗頽此風灌  
園何其鄙皎皎於陵中世道不相容嗟嗟張長公

聖人不利已憂濟在元元黃屋非堯意瑤臺安可論吾  
聞西方化清淨道彌敦奈何窮金玉雕刻以為尊雲構

山林盡瑤圖珠翠煩鬼工尚未可人力安能存夸愚適  
增累矜智道逾昏

元天幽且默羣議曷咄咄聖人教猶在世運久陵夷一  
繩將何繫憂醉不能持去去行采芝勿為塵所欺

蜻蛉遊天地與世本無患飛飛未能止黃雀來相干穰  
侯富秦寵金石比交歡出入咸陽裏諸侯莫敢言寧知  
山東客激怒秦王肝布衣取丞相千載為辛酸

微霜知歲宴斧柯始青青况乃金天夕浩露霑群英登  
山望宇宙白日已西暝雲海方蕩瀟孤鱗安得寧

翡翠巢南海雄雌珠樹林何知美人意驕愛比黃金殺  
身炎洲裏委羽玉堂陰旖旎光首飾歲蕤爛錦衾豈不



在遐遠虞羅忽見尋多材信為累歎息此珍禽

挈瓶者誰子姣服當青春三五明月滿盈盈不自珍高堂委金玉微縷懸千鈞如何負公鼎被欲笑時人

元蟬號白露茲歲已蹉跎群物從大化孤英將奈何瑤臺有青鳥遠食玉山禾崑崙見元鳳豈復虞雲羅

朝發宜都渚浩然思故鄉故鄉不可見路隔巫山陽巫山綵雲沒高丘正微茫佇立望已久涕落沾衣裳豈茲越鄉感憶昔楚襄王朝雲無處所荆國亦淪亡

昔日章華宴荆王樂荒淫霓旌翠羽蓋射兕雲夢林揭來高唐觀悵望雲陽岑雄圖今何在黃雀空哀吟

丁亥歲云暮西山事甲兵羸糧匝邛道荷戰爭羗城嚴

冬陰風勁窮岫泄雲生昏曠無晝夜羽檄復相驚拳跼競萬仞崩危走九冥籍籍峯壑裏哀哀冰雪行聖人御宇宙聞道泰階平肉食謀何失藜藿緬縱橫

可憐瑤臺樹灼灼美人姿碧華映朱實攀折青春時豈不盛光寵榮君白玉墀但恨紅芳歇凋傷感所思

揭來豪遊子勢利禍之門如何蘭膏歎感激自生冤衆趨明所避時棄道猶存雲淵既已失羅網與誰論箕山有高節湘水有清源唯應白鷗鳥可為洗心言

索居猶幾日炎夏忽然衰陽彩皆陰翳親友盡睽違登山望不見涕泣久漣沔宿昔感顏色若與白雲期世中驕豪子驅逐正蚩蚩蜀山與楚水攜手在何時

金鼎合神丹世人將見欺飛飛騎羊子胡乃在峨眉變  
化固非類芳菲能幾時疲疴苦淪世憂悔日侵淄眷然  
顧幽褐白雲空涕淚

朔風吹海樹蕭條邊已秋亭上誰家子哀哀明月樓自  
言幽燕客結髮事遠遊赤丸殺公吏白刃報私讐避讎  
至海上被役此邊州故鄉三千里遼水復悠悠每憤胡  
兵入常為漢國羞何知七十戰白首未封侯

本為貴公子平生實愛才感時思報國拔劍起蒿萊西  
馳丁零塞北上單于臺登山見千里懷古心悠悠誰言  
未忘禍磨滅成塵埃

浩然坐何慕吾蜀有峨眉念與楚狂子悠悠白雲期時

哉悲不會涕泣久漣沔夢登綏山穴南采巫山芝探元  
觀羣化遺世從雲螭婉孌時永矣感悟不見之  
仲尼探元化幽鴻順陽和大運自盈縮春秋遞來過盲  
颺忽號怒萬物相紛劇溟海皆震蕩孤鳳其如何

觀荆玉篇

并序

丙戌歲余從左補闕喬公北征夏四月軍幕次  
於張掖河河洲草木無他異者唯有仙人杖往  
往叢生幽朔地寒與中國稍異予家世好服食  
昔常飮之及此役也而息意茲味或有薦嘉蔬  
者此物存焉鞮爾而笑曰始者與此君別不圖  
至是而見之豈非神明嘉惠將欲扶吾壽也因

為喬公昌言其能時東萊王仲烈亦同旅舍聞  
而大喜甘心食之已旬有五日矣適有行人自  
謂能知藥者謂喬公曰此白棘也公何謬哉仲  
烈愕然而疑亦曰吾怪其味甘今果如此喬公  
信是言迺譏予作采玉篇謂宋人不識玉而寶  
珉石也予心知必是猶以獨見之故被奪於眾  
人迺喟然而嘆曰嗟乎人之大明者目也心之  
至信者口也夫日照五色口分五味元黃甘苦  
亦可斷而不惑矣而路傍一議二子增疑况君  
臣之際朋友之間乎自是而觀則萬物之情可  
見也感采玉詠而作觀玉篇以答之并示仲烈

譏其失真也

鴟夷雙白玉此玉有緇磷懸之千金價舉世莫知真丹  
青非異色輕重有殊倫勿信玉工言徒悲荆國人

鴛鴦篇

飛飛鴛鴦鳥舉翼相蔽虧俱來綠潭裏共向白雲涯音  
容相眷戀羽翮兩透迤蘋萍戲春渚霜霰遠寒池浦沙  
連岸淨汀樹拂潭垂年年此遊翫歲歲來追隨鳳皇起  
丹穴獨向梧桐枝鴻雁來紫塞空憶稻梁肥烏啼倦依  
託鶴鳴傷別離豈若此雙禽飛翻不異林刷尾青江浦  
交頸紫山岑文章負奇色和鳴多好音聞有鴛鴦綺復  
有鴛鴦衾持為美人贈勗此故交心

與東方左史虬修竹篇

并書

東方公足下文章道弊五百年矣漢魏風骨晉  
宋莫傳然而文獻有可徵者僕嘗暇時觀齊梁  
間詩彩麗競繁而興寄都絕每以永歎思古人  
常恐邈透頹靡風雅不作以耿耿也一昨於解  
三處見明公詠孤桐篇骨氣端翔音情頓挫光  
英朗練有金石聲遂用洗心飾視發揮幽鬱不  
圖正始之音復覩於茲可使建安作者相視而  
笑解君云張茂先何敬祖東方生與其比肩僕  
亦以為知言也故感歎雅製作修竹詩一首當  
有知音以傳示之

龍種生南嶽孤翠鬱亭亭峰嶺上崇翠烟雨下微冥夜  
聞鼯鼠叫晝聒泉壑聲春風正淡蕩白露已清泠哀響  
激金奏密色滋玉英歲寒霜雪苦含彩獨青青豈不厭  
凝冽羞比春木榮春木有榮歇此節無凋零始願與金  
石終古保堅貞不意伶倫子吹之學鳳鳴遂偶雲和瑟  
張樂奏天庭妙曲方千變簫韶亦九成信蒙雕斲美常  
願事仙靈驅馳翠虬駕伊鬱紫鸞笙結交羸臺女吟弄  
昇天行攜手登白日遠遊戲赤城低昂元鶴舞斷續彩  
雲生永隨衆仙逝三山遊玉京

薊丘覽古贈盧居士藏用

并序

丁酉歲吾北征出自薊門歷觀燕之舊都其城

池霸業迹已蕪昧矣乃慨然仰嘆憶昔樂生鄒  
子羣賢之遊盛矣因登薊丘作詩以志之寄終  
南盧居士亦有軒轅之遺跡也

北登薊丘望求古軒轅臺應龍已不見牧馬空黃埃尚  
想廣成子遺跡白雲隈軒轅臺

南登碣石坂遙望黃金臺丘陵盡喬木昭王安在哉霸

圖悵已矣驅馬復歸來燕昭王

王道已淪昧戰國競貪兵樂生何感激仗義下齊城雄

圖竟中天遺歎寄阿衡樂生

秦王日無道太子怨亦深一聞田光義匕首贈千金其

事雖不立千載為傷心燕太子

自古皆有死殉義良獨稀奈何燕太子尚使田生疑伏

劍誠已矣感我涕沾衣田光先生

西還至散關答喬補闕知之

歲蕤蒼梧鳳嘹唳白露蟬羽翰本非匹結交何獨全昔  
君事胡馬余得奉戎旃攜手向沙塞關河緬幽燕芳歲  
幾陽止白日屢徂遷功業雲臺薄平生玉佩捐歎此南  
歸日猶聞北戍邊代水不可涉巴江亦潺湲攬衣度函  
谷銜涕望秦川蜀門自茲始雲山方浩然

酬暉上人秋夜山亭有贈

皎皎白林秋微微翠山靜禪居感物變獨坐開軒屏風  
泉夜聲雜月露宵光冷多謝忘機人塵憂未能整

酬暉上人夏日林泉

聞道白雲居窈窕青蓮宇巖泉萬丈流樹石千年古林  
卧對軒牕山陰滿庭户方釋塵事勞從君襲蘭杜

登薊丘樓送賈兵曹入都

東山宿昔意北征非我心孤負平生願感涕下沾襟暮  
登薊樓上求望燕山岑遼海方漫漫胡沙飛且深  
峩眉杳如夢仙子曷由尋擊劒起歎息白日忽西沈聞君洛  
陽使因子寄南音

秋園卧病呈暉上人

幽寂曠日遙林園轉清密疲疴澹無豫獨坐汎瑤瑟懷  
挾萬古情憂虞百年疾綿綿多滯念忽忽每如失緬想

赤松遊高尋白雲逸榮吝始都喪幽人遂貞吉圖書紛  
滿牀山木藹盈室宿昔心所尚平生自茲畢願言誰見  
知梵筵有同術八月高秋晚涼風正蕭瑟

登幽州臺歌

前不見古人後不見來者念天地之悠悠獨愴然而涕  
下

近體詩

度荆門望楚

遙遙去巫峽望望下章臺巴國山川盡荆門煙霧開城  
分蒼野外樹斷白雲隈今日狂歌客誰知入楚來

晚次樂鄉縣

故鄉杳無際日暮且孤征川原迷舊國道路入邊城野  
戍荒煙斷溪山古木平如何此時恨噉噉夜猿鳴

送客

故人洞庭去楊柳春風生相送河洲晚蒼茫別思盈白  
蘋已堪把綠芷復含榮江南多桂樹歸客贈生平

春夜別友人

銀燭吐青煙金樽對綺筵離堂思琴瑟別路遶山川明  
月隱高樹長河沒曉天悠悠洛陽道此會在何年

送東萊王學士無競

寶劍千金買平生未許人懷君萬里別持贈結交親孤  
松宜晚歲衆木愛芳春已矣將何道無令白首新

送著作佐郎崔融等從梁王東征

金天方肅殺白露始專征王師非樂戰之子慎佳兵海  
氣侵南部邊風掃北平莫賣盧龍塞歸邀麟閣名

春晦餞陶七於江南同用風字

黃鶴煙雲去青江琴酒同離帆方楚越溝水復西東芙  
蓉生夏浦楊柳送春風明日相思處應對菊花叢

喜遇冀侍御珪崔司議泰之二使

并序

余獨坐一隅孤憤五蠹雖身在江海而心馳魏  
闕歲時仲春幽卧未起忽聞二星入井四牡臨  
亭邀使者之車乃故人之駕隱几一笑把臂入  
林既聞朝廷之樂復此琴樽之事山林幽寂鐘

鼎舊遊語默譚詠今復一得况北堂夜來西軒  
月微巴山有望別之嗟洛陽無寄載之客江關  
離會三千餘里名位寵辱一百年中歡娛如何  
日月其邁不為目前之賞以增別後之思蟋蟀  
殺人夫子何嘆

謝病南山下幽卧不知春使星入東井云是故交親惠  
風吹寶瑟微月憶清真憑軒一留醉江海寄情人

月夜有懷

美人挾趙瑟微月在西軒寂寞夜何久殷勤玉指繁清  
光委衾枕遙思屬湘沅空簾隔星漢猶夢感精魂

春日登金華觀

白玉仙臺古丹丘別望遙山川亂雲日樓榭入煙霄鶴  
舞千年樹虹飛百尺橋還疑赤松子天路坐相邀

白帝城懷古

日落滄江晚停橈問土風城臨巴子國臺沒漢王宮荒  
服仍周甸浚山尚禹功巖懸青壁斷地險碧流通古木  
生雲際孤帆出霧中川途去無限客思坐何窮

峴山懷古

秣馬臨荒甸登高覽舊都猶悲隋淚碣尚想卧龍圖城  
邑遙分楚山川半入吳丘陵徒自出賢聖幾凋枯野樹  
蒼煙斷津樓晚氣孤誰知萬里客懷古正踟躕

宿讓河驛浦



沿流辭北渚結纜宿南州合岸昏初夕迴塘暗不流卧  
聞塞鴻斷坐聽峽猿愁沙浦明如月汀葭晦若秋不及  
能鳴雁徒思海上鷗天河殊未曉滄海信悠悠

和陸明府贈將軍重出塞

忽聞天上將關塞重橫行始返樓蘭國還向朔方城黃  
金裝戰馬白羽集神兵星月開天陣山川列地營晚風  
吹畫角春色耀飛旌寧知班定遠猶是一書生

秋日遇荊州府崔兵曹使宴

并序

若夫尊卑位隔榮賤途分使卿士大夫倚軒裳  
而傲物山棲木食負林壑而驕人未有能屈富  
貴於沈冥雜薜蘿於簪笏天人坐契相從雲霧

之遊風雨不疲高縱琴樽之賞崔兵曹紫庭公  
胄青雲貴人以鐘鼎不足以致奇才烟霞可以  
交名士皇華昭國懷鳳綉而高尋白桂追遊邀  
兔置而下顧大矣哉生平未識一見而交道遂  
存此日披懷千載之風期坐合支道林之雅論  
妙理沈微崔子玉之雄才斯文未喪屬乎金龍  
掌氣石鴈驚秋天次寥而烟日無光野寂寞而  
山川變色芸其黃矣悲白露於蒼葭木葉落兮  
慘紅霜於綠野爾其高興洽芳酒闌頓羲和而  
不留顧華堂而欲晚長歌何託思傳稽古之文  
爰命小人率記當時之事人探一字六韻成篇

輜軒鳳凰使林藪鷓鴣冠江湖一相許雲霧坐交歡興  
盡崔亭伯言忘釋道安林光稍欲暮歲物已將闌古樹  
蒼烟斷虛庭白露寒瑤琴山水曲今日為君彈

入東陽峽與李明府舟前後不相及

東巖初解纜南浦遂離羣出沒同洲島沿洄異渚濱風  
煙猶可望歌笑浩難聞路轉青山合峯迴白日曛奔濤  
上漫漫積水下泫泫倏忽猶疑及差池復兩分離離間  
遠樹藹藹沒遥氛地上巴陵道星連牛斗文孤狄啼寒  
月哀鴻叫斷雲仙舟不可見搖思坐氛氲

南山家園林木交映盛夏五月幽然清涼獨坐思

遠率成十韻

寂寥守窮巷幽獨卧空林松竹生虛白階庭橫古今鬱  
蒸炎夏晚涼宇閔清陰軒窓交紫靄簷戶對蒼岑鳳蘊  
仙人籀鸞歌素女琴忘機委人代閉牖察天心蛺蝶憐  
紅藥蜻蜓愛碧潯坐觀萬象化方見百年侵擾擾將何  
息青青長苦吟願隨白雲駕龍鶴相招尋

杜審言

審言字必簡襄陽人舉進士為隰城尉雅善五言  
詩工書翰恃才褻傲為世所嫉嘗謂人曰吾文章  
合得屈宋作衙官吾書跡合得王羲之北面則天  
召見累遷膳部員外郎神龍初坐通張易之兄弟  
流峯州入為修文館學士卒與李嶠崔融蘇味道

為文學四友

紀事云審言初貶吉州司戶與同僚不叶司馬周季重司戶郭若訥誣以罪繫獄審言子并年十三因季重酒酣懷刃刺之季重臨死曰吾不識審言有孝子若訥誤我亦焉避害審言因此免官還東都則天召將用之問曰卿喜否審言舞蹈謝恩因作歡喜詩授著作郎神龍初坐通張易之流峯州入為修文館學士卒將死謂宋之問武平一曰吾在久壓公等今且死因大慰但恨不見替人云李嶠等請加命時武平一為表云審言譽鬱中朝文高前列是以升榮粉署擢秀蘭臺往以微瑕久從

遠謫陛下膺圖玉宸下制金門收賈誼於長沙返蔡邕於左校審言獲登文館預奉屬車未獻長卿之辭遽啓元瑜之悼臣等積薪增愧焚芝盈感伏乞恩加朱紱寵及幽泉假飭終之儀舉哀榮之典庶弊帷莫棄墜履無遺乃贈著作郎制曰漢覃恩祐方慶於同時漳浦沉疴忽歸於厚夜蒿里修文之地永闕音徽蓬山著作之曹宜加寵數

近體詩

蓬萊三殿侍宴奉敕詠終南山應制

北斗掛城邊南山倚殿前雲標金闕迴樹杪玉堂懸半嶺通佳氣中峰繞瑞烟小臣持獻壽長此戴堯天

宿羽亭侍宴應制

步輦千門出離宮二月開風光新柳報宴賞落花催碧水搖空閣青山繞吹臺聖情留晚興歌管送餘杯

賦得妾薄命

草綠長門掩苔青永巷幽寵移新夢奪淚落故情留啼鳥驚殘夢飛花攪獨愁自憐春色罷團扇復迎秋

和韋承慶過義陽公主山池

逕轉危峰逼橋迴缺岸妨玉泉移酒味石髓換稷香綰霧青絲弱牽風紫蔓長猶言宴樂少別向後池塘攜琴遶碧沙搖筆弄青霞杜若幽庭草芙蓉曲沼花宴遊成野客形勝得山家往往畱仙步登攀日易斜

攢石當軒倚懸泉度牖飛鹿麕銜妓席鶴子曳童衣園果嘗難遍池蓮摘未稀卷簾唯待月應在醉中歸賞翫奇他日高深夢此時地分八水背峰作九山疑池靜魚偏逸人間鳥欲欺青谿留別興更與白雲期

和晉陵陸丞早春遊望

獨有宦遊人偏驚物候新雲霞出海曙梅柳渡江春淑氣催黃鳥晴光照綠蘋忽聞歌古調歸思欲霑巾

秋夜宴臨津鄭明府宅

行止皆無地招尋獨有君酒中堪累月身外卽浮雲露白宵鐘徹風清曉漏聞坐攜餘興往還似未離羣

和康五庭芝望月有懷

明月高秋迴愁人獨夜看暫將弓竝曲翻與扇俱團露  
濯清輝苦風飄素影寒羅衣一此鑒頓使別離難

旅寓安南

交趾殊風候寒遲暖復催仲冬山果熟正月野花開積  
雨生昏霧輕霜下震雷故鄉踰萬里客思倍從來

都尉山亭

紫藤縈葛藟綠刺胃薔薇下釣看魚躍探巢畏鳥飛葉  
疎荷已晚枝亞果新肥勝迹都無限只應伴月歸

夏日過鄭七山齋

共有樽中好言尋谷口來薜蘿山逕入荷芰水亭開日  
氣含殘雨雲陰送晚雷洛陽鐘鼓至車馬繫遲回

送崔融

君王行出將書記遠從征祖帳連河闕軍麾動洛城旌  
旃朝朔氣笳吹夜邊聲坐覺烟塵掃秋風古北平

扈從出長安應制

分野都畿列時乘六御均京師舊西幸洛道此東巡文  
物驅三統聲明走百神龍旗縈漏夕鳳輦拂鈞陳撫迹  
地靈古游情皇鑒新山追散馬日水憶釣魚人禹食傳  
中使堯樽遍下臣省方稱國阜問道識風淳歲晚天行  
吉年豐景從親歡娛包歷代宇宙忽疑春

春日江津遊望

旅客搖邊思春江弄晚晴煙銷垂柳弱霧捲落花輕飛

棹乘空下回流向日平鳥啼移幾處蝶舞亂相迎忽歎  
人皆濁隄防水至清谷王常不讓深可戒中盈

度石門山

石門千仞斷迸水落遙空道束懸崖半橋欹絕澗中仰  
攀人屢息直下騎纔通泥擁奔蛇徑雲埋伏獸叢星躔  
牛斗北地脉象牙東開塞隨行變高溪觸望同江聲連  
驟雨日氣抱殘虹未改朱明律先含白露風堅貞溪不  
憚險澀諒難窮有異登臨賞徒爲造化功

贈蘇味道

北地寒應苦南庭戍未歸邊聲亂羌笛朔氣卷戎衣雨  
雪關山暗風霜草木稀胡兵戰欲盡漢卒尚重圍雲淨

妖星落秋深塞馬肥據鞍雄劔動搖筆羽書飛輿駕還  
京邑朋游滿帝畿方期來獻凱歌舞共春輝

和李大夫嗣真奉使存撫河東

六位乾坤動三微曆數遷謳歌移火德圖讖在金天子  
月開階統房星受命年禎符龍馬出寶籙鳳皇傳地即  
交風雨都仍卜澗灑明堂唯御極清廟乃尊先不宰神  
功運無爲大象懸八荒平物土四海接人煙已屬群生  
泰猶言至道偏璽書傍問俗旌節近推賢秩比司空位  
官臨御史負推詞執刀筆直諫罷樓船國有大臣器朝  
加小會筵將行備禮樂送別仰神仙城闕周京轉關河  
陝服連稍觀汾水曲俄指絳臺前姑射聊長望平陽遂

宛然舜耕餘草木禹鑿舊山川昔出諸侯上無何霸業  
全中軍歸戰敵外府絕兵權隱隱帝鄉遠瞻瞻肅命虔  
西河偃風俗東壁掛星躔井邑粉榆社陵園松柏田榮  
光晴掩代佳氣曉侵燕雨霈鴻私滌風行睿旨宣憚  
訪疾苦屠釣採貞堅人樂逢刑措時康洽賞延賜踰秦  
氏級恩倍漢家錢擁傳咸翹首稱觴競比肩拜迎彌道  
路舞詠溢郊鄠殺氣西衡白窮陰北暝元飛霜遙渡海  
殘月迴臨邊緬邈朝廷問周流朔塞旋興來探馬策俊  
發抱龍泉學總八千卷文傾三百篇澄清得使者作頌  
有人焉莫以崇班閔而云勝託捐偉才何磊落陋質幾  
翩翩江海寧爲讓巴渝轉自牽一聞歌聖道助曲荷陶

甄

守歲侍宴應制

季冬除夜接新年帝子王孫捧御筵宮闕星河低拂樹  
殿庭燈燭上薰天彈絃奏節梅風入對局探鈎柏酒傳  
欲向正元歌萬壽暫留歡賞寄春前

大酺

毘陵震澤九州通士女歡娛萬國同伐鼓撞鐘驚海上  
新妝袿服照江東梅花落處疑殘雪柳葉開時任好風  
火德雲官逢道泰天長地久屬年豐

春日京中有懷

今年遊寓獨遊秦愁思看春不當春上林苑裏花徒發

細柳營前葉漫新  
公子南橋應盡興  
將軍西第幾畱賓  
寄語洛城風日道  
明年春色倍還人

贈蘇綰書記

知君書記本翩翩  
為許從戎赴朔邊  
紅粉樓中應計日  
燕支山下莫經年

渡湘江

遲日園林悲昔遊  
今春花鳥作邊愁  
獨憐京國人南竄  
不似湘江水北流

戲贈趙使君美人

紅粉青娥映楚雲  
桃花馬上石榴裙  
羅敷獨向東方去  
謾學他家作使君

御定全唐詩錄卷第五



御定全唐詩錄卷第六

禮部侍郎臣徐倬翰林院侍讀學士臣徐元正奉

旨校刊

沈佺期

佺期字雲卿相州內黃人也進士舉長安中累遷  
通事舍人預修三教珠英再轉考功員外郎坐贓  
配流嶺表神龍中授起居郎加修文館直學士後  
歷中書舍人太子詹事

新唐書云建安後訖江左詩律屢變至沈約庾信  
以音韻相婉附屬對精密及宋之問沈佺期尤加  
靡麗回忌聲病約句準篇如錦繡成文學者宗之

全唐詩錄卷第六 沈佺期

全唐詩錄卷第六

沈佺期

一

號為沈宋語曰蘇李居前沈宋比肩

紀事云張燕公說嘗謂佺期曰沈三兄詩須還他  
第一嘗侍宴為弄詞悅帝其詞云迴波爾時佺期  
流向嶺外生歸身名已蒙齒錄袍笏未復牙緋帝  
悅因賜牙緋

古體詩

芳樹

何地早芳菲宛在長門殿天桃色若綬穠李光如練啼  
鳥弄花疎遊蜂飲香遍歎息春風起飄零君不見

長安道

秦地平如掌層城入雲漢樓閣九衢春車馬千門旦綠

槐開復合紅塵聚還散日晚鬪雞還經過狹斜看

臨高臺

高臺臨廣陌車馬紛相續回首思舊鄉雲山亂心曲遠  
望河流緩周看原野綠向夕林鳥還憂來飛景促

古別離

白水東悠悠中有西行舟舟行有返樵水去無還流奈  
何生別者戚戚懷遠遊遠遊誰當惜所悲會難收自君  
聞芳躡青陽四五道皓月掩蘭室光風虛蕙樓相思無  
明晦長歎累春秋離居久遲暮高駕何淹留

和杜麟臺元志春情

嘉樹滿中園氛氳羅秀色不見仙山雲倚琴空太息沈

思若在夢緘怨似無憶青春坐南移白日忽西匿蛾眉  
返清鏡閨中不相識

送喬隨州侶

結友三十載同遊一萬里情為契濶生心由別離死拜  
恩前後人從宦差池起今爾歸漢東明珠報知己

自樂昌郡泝流至白石嶺下行入郴州

茲山界夷夏天險橫寥廓太史漏登探文命限開鑿北  
流自南瀉群峯迴衆壑馳波如電騰激石似雷落崖留  
盤古樹澗蓄神農藥乳竇何淋漓苔蘚更彩錯娟娟潭  
裏虹渺渺灘邊鶴歲杪應流火天高雲霧薄金風吹綠  
梢玉露洗紅籜泝舟始興解登踐桂陽郭匍匐緣修坂  
穹窿曳長紵礙林阻往來過堰每前却救艱不遑飯畢  
昏無暇泊濯谿寧足懼磴道誰云惡我行湍險多山水  
皆不若安能獨見聞書此貽京洛

過蜀龍門

龍門非禹鑿詭怪乃天功西南出巴峽不與衆山同長  
竇亘五里宛轉復嵌空伏湍煦潛石瀑水生輪風流水  
無晝夜噴薄龍門中潭河勢不測藻葩垂彩虹我行當  
季月煙景共春融江關勤亦甚巘嶮意難窮誓將息機  
事煉藥此山東

初達驩州

流子一十八命予偏不偶配遠天遂窮到遲日最後水

行儻耳國陸行雕題藪魄游鬼門骸骨遺鯨口夜則  
恐饑卧朝則抱病走搔首向南荒拭淚看北斗何年赦  
書來重飲洛陽酒

古歌

落葉流風向玉臺夜寒秋思洞房開水晶簾外金波下  
雲母窓前銀漢迴玉階陰陰苔蘚色君王履綦難再得  
璇閨窈窕秋夜長繡戶徘徊明月光燕姬綵帳芙蓉色  
秦女金爐蘭麝香北斗七星橫夜半清歌一曲斷君腸

七夕曝衣篇

君不見昔日宜春太液邊披香畫閣與天連燈火灼爍  
九微映香氣氤氳百和然此夜星繁河正白人傳織女

牽牛客宮中擾擾曝衣樓天上娥娥紅粉席曝衣何許  
曛半黃宮中綵女提玉箱珠履奔騰上蘭砌金闈宛轉  
出梅梁絳河裏碧煙上雙花伏兔畫屏風四子盤龍擎  
斗帳舒羅散縠雲霧開綴玉垂珠星漢迴朝霞散彩羞  
衣架晚月分光劣鏡臺上有仙人長命綵中看玉女迎  
歡繡璫瑁筵中別作春珊瑚窓裏翻成畫椒房金屋寵  
新流意氣驕奢不自由漢文宜惜露臺費晉武須焚前  
殿裘

入少密谿

雲峯苔壁遶谿斜江路香風夾岸花樹密不言通鳥道  
雞鳴始覺有人家家更在溪巖口澗水周流宅前後

遊魚瞥瞥雙釣童伐木丁丁一樵叟自言避喧非避秦  
薜衣耕鑿帝堯人相留且待雞黍熟夕卧溪山蘿月春  
近體詩

晦日漣水應制

素漣接宸居青門盛被除摘蘭喧鳳野浮棗溢龍渠苑  
蝶飛殊嬾宮鶯轉不疎星移天上入歌舞向儲胥

三日梨園侍宴

九重馳道出三已禊堂開畫鷁中流動青龍上苑來野  
花飄御座河柳拂天杯日晚迎祥處笙鏞下帝臺

九日臨渭亭侍宴應制得長字

御氣幸金方憑高薦羽觴魏文頒菊藥漢武賜萸囊秋

變銅池色晴添銀樹光年年重九慶日月奉天長

仙萼亭初成侍宴應制

山中氣色和宸賞第中過輦路披仙掌帷宮拂帝蘿泉  
臨香澗落峰入翠雲多無異登懸圃東南望白河

送金城公主適西蕃應制

金榜扶丹掖銀河屬紫閣那堪將鳳女還以嫁烏孫玉  
就歌中怨珠辭掌上恩西戎非我匹明主至公存

幸白鹿觀應制

紫鳳真人府斑龍太上家天流芝蓋下山轉桂旗斜聖  
藻垂寒露仙杯落晚霞唯應問王母桃作幾時花

巫山高

巫山峯十二合沓隱昭回俯眺琵琶峽平看雲雨臺古  
槎天外倚瀑水日邊來何忍猿啼夜荆王枕席開  
神女向高唐巫山下夕陽裴徊作行雨婉孌逐荆王電  
影江前落雷聲峽外長霽雲無處所臺館曉蒼蒼

折楊柳

玉牕朝日暎羅帳春風吹拭淚攀楊柳長條踈地垂白  
花飛歷亂黃鳥度參差妾自肝腸斷傷人那得知

雜詩

鐵馬三軍去金閨二月還邊愁離上國春夢失陽關池  
水瑠璃淨園花玳瑁斑歲華空自擲愁怨不勝顏  
落葉驚秋婦高砧促暝機蜘蛛尋月度螢火傷人飛清

鏡紅埃入孤燈綠焰微怨啼能至曉獨自懶縫衣  
妾家臨渭北春夢著遼西何苦朝鮮郡年年事鼓鞞燕  
來紅壁語鶯向綠窗啼為許長相憶闌干玉筋齊  
聞道黃龍戍頻年不解兵可憐閨裏月長在漢家營少  
婦今春意良人昨夜情誰人將旗鼓一為取龍城

剪綵

宮女憐芳樹栽花競早榮寒依刀尺盡春向綺羅生弱  
蒂盤絲發香蕤結素成纖枝幸不棄長就玉階傾

樂城白鶴寺

碧海開龍藏青雲起鴈堂潮聲迎法鼓雨氣濕天香樹  
接前山暗谿承瀑水涼無言謫居遠清淨得空王

游少林寺

長歌遊寶地徙倚對珠林  
雁塔風霜古龍池歲月淡  
紺園澄夕霽碧殿下秋陰  
歸路煙霞晚山蟬處處吟

嶽館

洞壑仙人館孤峰玉女臺  
空濛朝氣合窈窕夕陽開  
流澗含輕雨虛巖應薄雷  
正逢鸞與鶴歌舞出天來

早發平昌島

解纜春風後鳴榔曉漲前  
陽烏出海樹雲雁下江煙積  
氣衝長島浮光溢大川  
不能懷魏闕心賞獨泠然

夜宿七盤嶺

獨遊千里外高卧七盤西  
山月臨床近天河入戶低  
芳

春平仲綠清夜子規啼  
浮客空留聽襄城聞曙雞

十三四時嘗從巫峽過他日偶然有思

小度巫山峽荆南春欲分  
使君灘上草神女廟前雲  
樹悉江中見猿多天外聞  
別來如夢裏一想一氛氲

初達驩州

自昔聞銅柱行來向一年  
不知林邑地猶隔道明天  
雨露何時及京華若個邊  
思君無限淚堪作日南泉

驩州風土不作寒食

嶺外無寒食春來不見錫  
洛中新甲子何日是清明  
花柳爭朝發軒車滿路迎  
帝鄉遙可念腸斷報親情

白蓮花亭侍宴應制

九日陪天仗三秋幸禁林霜威變綠樹雲氣落青岑水  
殿黃花合山亭絳葉深朱旗夾小徑寶馬駐清潯苑吏  
收寒果饗人膳野禽承歡不覺暝遙響素秋砧

仙萼池亭侍宴應制

步輦尋丹嶂行宮在翠微川長看鳥滅谷轉聽猿稀天  
磴扶階迥雲泉透戶飛閒花開石竹幽葉吐薔薇徑狹  
難留騎亭寒欲進衣白龜來獻壽仙吹返彤闈

奉和晦日駕幸昆明池應制

法駕乘春轉神池象漢迴雙星移舊石孤月隱殘灰戰  
鷁逢時去恩魚望幸來岸花緹騎遶堤柳幔城開思逸  
橫汾唱歡流宴鎬杯微臣雕朽質羞覩豫章材

奉和聖製幸禮部尚書竇希玠宅

北闕垂旒暇南宮聽禮迴天臨翔鳳轉恩向躍龍開蘭  
氣承仙帳榴花引御杯水從金穴吐雲是玉衣來池影  
搖歌席林香散舞臺不知行漏晚清蹕尚徘徊

酬蘇貞外味道夏晚寓直省中見贈

並命登仙閣分曹直禮闈大官供宿膳侍史護朝衣卷  
幔天河入開窗月露微小池殘暑退高樹早涼歸冠劍  
無時釋軒車待漏飛明朝題漢柱三署有光輝

和韋舍人早朝

闔闔連雲起巖廊拂霧開玉珂龍影度珠履雁行來長  
樂宵鐘盡明光曉奏催一經推舊德五字擢英才儼若



神仙去紛從霄漢迴千春奉休曆分禁喜趨陪

夜遊

今夕重門啓遊春得夜芳月華連晝色燈影雜星光南陌青絲騎東隣紅粉妝管絃遙辨曲羅綺暗聞香人擁行歌路車攢鬪舞場經過猶未已鐘鼓出長楊

入鬼門關

昔傳瘴江路今到鬼門關土地無人老流移幾客還自從別京洛頽鬢與衰顏夕宿含沙裏晨行岡路間馬危千仞谷舟險萬重灣問我投何地西南盡百蠻

哭蘓眉州崔司業二公

并序

同時郎裴懷古者作牧潭府神龍三年秋八月

佺期承恩北歸途中覲止訪及故舊知眉州蘓使君味道國子崔司業融馳旋間相次而逝蘓往任鳳閣侍郎佺期忝通事舍人崔重為鳳閣舍人佺期又遷給事竝啣疇昔之眷俱荷提獎之恩前年負譴南荒二公先移官守迨此凶問情理何堪所歎逐竄有期行邁在遠哀不展舊禮不申卑流慟斯文冀通幽路

渙汗天中發伶俜海外旋長沙遇太守問舊幾人全國寶亡雙傑天才喪兩賢大名齊弱歲高德並中年風鑑王夷甫文章謝惠連相看尚元鬢相次入黃泉流放蠻陬濶鄉關帝里偏親朋雲霧擁生死歲時傳崔昔揮宸

翰蘇嘗濟巨川絳衣陪下列黃閣謬差肩及此俱冥昧  
云誰叙播遷隼輿懷舊轍鱣館想虛筵家慶方休杵皇  
慈更撤縣銘旌西蜀路騎吹北印田隴樹應秋矣江帆  
故杳然罷琴明月夜留劍白雲天涕泗湘潭水淒涼衡  
嶠煙古來修短分神理竟難筌

奉和立春遊苑迎春

東郊暫轉迎春仗上苑初飛行慶杯風射蛟冰千片斷  
氣衝魚鑰九關開林中覓草纔生蕙殿裏爭花併是梅  
歌吹銜恩歸路晚棲烏半下鳳城來

人日重宴大明宮賜綵縷人勝應制

拂旦鷄鳴仙衛陳憑高龍首帝城春千官黼帳杯前壽

百福香奩勝裏人山鳥初來猶怯囀林花未發已偷新  
天文正應韶光轉設報懸知用此辰

奉和春初幸太平公主南莊應制

主家山第早春歸御輦春遊繞翠微買地鋪金曾作埒  
尋河取石舊支機雲間樹色千花滿竹裏泉聲百道飛  
自有神仙鳴鳳曲併將歌舞報恩暉

奉和春日幸望春宮應制

芳郊綠野散春晴複道離宮煙霧生楊柳千條花欲綻  
葡萄百丈蔓初縈林香酒氣元相入鳥囀歌聲各自成  
定是風光牽宿醉來晨復得幸昆明

侍宴安樂公主新宅應制

皇家貴主好神仙別業初開雲漢邊山出盡如鳴鳳嶺  
池成不讓飲龍川妝樓翠幌教春住舞閣金鋪借日懸  
敬從乘輿來此地稱觴獻壽樂鈞天

龍池篇

龍池躍龍龍已飛龍德先天天不違池開天漢分黃道  
龍向天門入紫微邸第樓臺多氣色君王鳧雁有光輝  
為報寰中百川水來朝此地莫東歸

興慶池侍宴應制

碧水澄潭映遠空紫雲香駕御微風漢家城闕疑天上  
秦地山川似鏡中向浦迴舟萍已綠分林蔽殿槿初紅  
古來徒羨橫汾賞今日宸遊聖藻雄

從幸香山寺應制

南山奕奕通丹禁北闕峩峩連翠雲嶺上樓臺千地起  
城中鐘鼓四天聞旃檀曉閣金輿度鸚鵡晴林采旄分  
願以醍醐參聖酒還將祇苑當秋汾

紅樓院應制

紅樓疑見白毫光寺逼宸居福盛唐支遁愛山情漫切  
曇摩泛海路空長經聲夜息聞天語鑪氣晨飄接御香  
誰謂此中難可到自憐深院得迴翔

再入道場紀事應制

南方歸去再生天內殿今年異昔年見闢乾坤新定位  
看題日月更高懸行隨香輦登仙路坐近鑪煙講法筵

自喜恩深陪侍從兩朝長在聖人前

高山石宗侍宴應制

金輿旦下綠雲衢  
綵殿晴臨碧澗隅  
谿水泠泠逐行漏  
山煙片片引香爐  
仙人六膳調神鼎  
玉女三漿捧帝壺  
自惜汾陽紆道駕  
無如太室覽真圖

古意呈補闕喬知之

盧家少婦鬱金堂  
海燕雙棲玳瑁梁  
九月寒砧催木葉  
十年征戍憶遼陽  
白狼河北音書斷  
丹鳳城南秋夜長  
誰為含愁獨不見  
更教明月照流黃

遙同杜負外審言過嶺

天長地濶嶺頭分  
去國離家見白雲  
洛浦風光何所似

崇山瘴癘不堪聞  
南浮漲海人何處  
北望衡陽雁幾群  
兩地江山萬餘里  
何時重謁聖明君

夜宴安樂公主宅

濯龍門外主家親  
鳴鳳樓中天上人  
自有金杯迎甲夜  
還將綺席代陽春

苑中遇雪應制

北闕彤雲掩曙霞  
東風吹雪舞山家  
瓊章定少千人和  
銀樹長芳六出花

宋之問

之問字延清號州弘農人弱冠知名尤善五言詩  
初徵令與楊炯分直內教俄授雒州參軍累轉尚

方監丞預修三教珠英嘗扈從遊宴坐附張易之  
左遷瀧州參軍未幾逃還匿於雒陽人張仲之家  
仲之與駙馬都尉王同皎等謀殺武三思之問令  
兄子發其事以自購及同皎等獲罪起為鴻臚主  
簿由是深為義士所譏景龍中再轉考功員外郎  
時中宗增置修文館學士之問與薛稷杜審言等  
首膺其選尋轉越州長史睿宗即位以之問附張  
易之武三思配徙欽州先天中賜死於徙所友人  
武平一纂集其詩

僧皎然云沈宋為有唐律之龜鑑情多興遠語麗  
為多真射鵰手使曹劉降格為之吾未知其孰勝

古體詩

初到陸渾山莊

授衣感窮節策馬凌伊關歸齊逸人趣日覺秋琴閒寒  
露衰北阜夕陽破東山浩歌步榛樾棲鳥隨我還

夜飲東亭

春泉鳴大壑皓月吐層岑岑壑景色佳慰我遠遊心暗  
芳足幽氣驚棲多衆音高興南山曲長謠橫素琴

送趙六貞固

目斷南浦雲心醉東郊柳怨別此何時青芳來已久與  
君共時物盡此盈樽酒始願今不從春風戀攜手

題張老松樹

歲晚東巖下周顧何悽惻日落西山陰衆草起寒色中  
有喬松樹使我長嘆息百尺無寸枝一生自孤直

別之望後獨宿藍田山莊

鶴鴿有舊曲調苦不成歌自嘆兄弟少常嗟離別多爾  
尋北京路予卧南山阿泉晚更幽咽雲秋尚差莪藥欄  
聽蟬噪書幌見禽過愁至願甘寢其如鄉夢何

浣紗篇贈陸上人

越女顏如花越王聞浣紗國微不自寵獻作吳王娃山  
藪半潛匿苧蘿更蒙遮一行霸勾踐再笑傾夫差艷色  
奪人目數嘖亦相誇一朝還舊都靚妝尋若耶鳥驚入  
松網魚畏沉荷花始覺冶容妄方悟羣心邪欽子秉幽

意世人共稱嗟願言托君懷倘類蓬生麻家住雷門曲  
高閣凌飛霞淋漓翠羽帳旖旎綵雲車春風艷楚舞秋  
月纏胡笳自昔專嬌愛襲玩唯矜奢達本知空寂棄彼  
猶泥沙永割偏執性自長薰修芽攜妾不障道來止妾  
西家

雨從箕山來

雨從箕山來倏與飄風度晴明西峯日綠縟南谿樹此  
時客精廬幸蒙真僧顧淡入清淨理妙斷往來趣意得  
兩契如言盡共忘喻觀花寂不動聞鳥懸可悟向夕聞  
天香淹留不能去

初至崖口

崖口衆山斷嶽峯聳天壁氣衝落日紅影入春潭碧錦  
續織苔蘚丹青畫松石水禽泛容與巖花飛的皪微路  
從此深我來恨于役惆悵情未已羣峰暗將夕

自湘源至潭州衡山縣

浮湘沿迅湍逗浦凝遠盼漸見江勢潤行嗟水流漫赤  
岸雜雲霞綠竹緣谿澗向背群山轉應接良景晏沓障  
連夜猿平沙覆陽雁紛吾望闕容歸橈速已慣中道方  
泝洄遲念自茲撰賴欣衡陽美持以蠲憂患

入崖口五渡寄李適

抱琴登絕壑伐木泝清川路極意謂盡勢迴趣轉綿人  
遠草木秀山深雲景鮮余負海嶠情自昔微尚然彌曠

十餘載今來宛仍前未窺仙源極獨進野人船時攀乳  
竇憇屢薄天牕眠夜絃響松月朝楫弄苔泉因冥象外  
理永謝區中緣碧潭可遺老丹砂堪學仙莫使馳光暮  
空令歸鶴憐

景龍三年春祠海

肅事祠春演宵齋洗蒙慮雞鳴見日出鷺下驚濤驚地  
濶八荒近天迴百川澍筵端接空曲目外惟雰霧暖氣  
物象來周遊晦明互致牲非元享禋滌期靈煦的的波  
際禽沄沄島間樹安期今何在方丈蔑尋路仙事與世  
隔冥搜徒已屢四明背群山遺老莫辨處撫中良自慨  
弱齡添恩遇三入文史林兩拜神仙署雖歎出關遠始

知臨海趣賞來空自多理勝孰能喻畱楫竟何待徙倚  
忽云暮

溫泉莊卧病寄楊七炯

多病卧茲嶺寥寥倦幽獨賴有嵩丘山高枕長在目茲  
山棲靈異朝夕翳雲族是日濛雨晴返景入巖谷羃羃  
澗畔草青青山下木此意方無窮環顧悵林麓伊洛何  
悠漫川原信重複夏餘鳥獸蕃秋末禾黍熟秉願守樊  
圃歸閒欣藝牧惜無載酒人徒把涼泉掬

敬答田徵君

家臨清谿水谿水繞盤石綠蘿四面垂裊裊百餘尺風  
泉度絲管苔蘚鋪茵席傳聞潁陽人霞外漱靈液忽枉

巖中翰吟望朝復夕何當遂遠遊物色候逋客

宿雲門寺

雲門若邪裏泛鷁路纔通夤緣綠篠岼遂得青蓮宮天  
香衆壑滿夜梵前山空漾漾潭際月颼颼杉上風茲焉  
多嘉遯數子今莫同鳳歸慨處士鹿化聞仙公樵路鄭  
州北舉井阿巖東永夜豈云寐曙華忽葱蘢谷鳥嚙尚  
澀源桃驚未紅再來期春暮當造林端窮庶幾蹤謝客  
開山投剡中

遊陸渾南山自歇馬嶺到楓香林以詩代書答李

舍人適

晨登歇馬嶺遙望伏牛山孤出羣峰首熊羆元氣間太



和亦崔嵬石扇橫閃修細岑互攢倚浮巘競奔蹙白雲  
遙入懷青靄近可掬徒尋靈異跡周顧愜心目晨拂鳥  
路行暮投人煙宿稔稻遠彌秀栗芋秋新熟石髓非一  
巖藥苗乃萬族間關踏雲雨繚繞緣水木西見商山芝  
南到楚鄉竹楚竹幽且深半雜楓香林浩歌清潭曲寄  
爾桃源心

下桂江縣黎壁

放溜覲前淑連山分上干江回雲壁轉天小霧峰攢乳  
沫跳急浪合流環峻灘欹雜出漩劃繚繞避渦盤舟子  
怯桂水最云斯路難吾生抱忠信吟嘯自安閒旦別已  
千歲夜愁勞萬端企予見夜月委曲破林巒潭曠竹烟

盡洲香橘露團豈傲夙所好對之與俱歡思君罷琴酌  
泣此夜漫漫

至端州驛見杜五審言沈三佺期閻五朝隱王二  
無競題壁慨然成詠

逐臣北地承嚴譴謂到南中每相見豈意南中岐路多  
千山萬水分鄉縣雲搖雨散各翻飛海濶天長音信稀  
處處山川同瘴癘自憐能得幾人歸

明河篇

八月涼風天氣晶萬里無雲河漢明昏見南樓清且淺  
曉落西山縱復橫洛陽城闕天中起長河夜夜千門裏  
複道連甍共蔽虧畫堂瓊戶特相宜雲母帳前初汎濫

水精簾外轉逶迤倬彼昭回如練白復出東城接南陌  
南陌征人去不歸誰家今夜擣寒衣鴛鴦機上疏螢度  
烏鵲橋邊一雁飛雁飛螢度愁難歇坐見明河漸微沒  
已能舒卷任浮雲不惜光輝讓流月明河可望不可親  
願得乘槎一問津更將織女支機石還訪成都賣卜人

武后時之問求為北門學士不許乃作此篇以見意后見之謂  
崔融曰非不知之問有奇才但恨有口過耳注口過謂口臭也

### 龍門應制

宿雨霽氛埃流雲度城闕河堤柳新翠苑樹花先發洛  
陽花柳此時濃山水樓臺映幾重群公拂霧朝翔鳳天  
子乘春幸鑿龍鑿龍近出王城外羽從琳瑯擁軒蓋雲  
蹕纔臨御水橋天衣已入香山會山壁嶄巖斷復連清

流澄澈俯伊川雁塔遥遥綠波上星龕奕奕翠微邊層  
巒舊長千尋木遠壑初飛萬丈泉綵仗紅旌遶香閣下  
輦登高望河洛東城宮闕擬昭回南陌溝塍殊綺錯林  
下天香七寶臺山中春酒萬年杯微風一起祥花落仙  
樂初鳴瑞鳥來鳥來花落紛無已稱觴獻壽香霞裏歌  
舞淹留景欲斜石關猶駐五雲車鳥旗翼翼留芳草龍  
騎駸駸映晚花千乘萬騎鑿輿出水靜山空嚴警蹕郊  
外喧喧引看人傾都南望屬車塵囂聲引颺聞黃道王  
氣周迴入紫宸先王定鼎山河固寶命乘周萬物新吾  
君不事瑤池樂時雨來觀農扈春

武后遊龍門命羣官賦詩先成  
者賜以錦袍左史東方虬詩成  
拜賜坐未安之問詩成文理兼  
美左右稱善乃就奪錦袍衣之

放白鷗篇

故人贈我綠綺琴兼致白鷗鳥琴是嶧山桐鳥出吳谿  
中我心松石清霞裏弄此幽弦不能已我心河海白雲  
垂憐此珍禽空自知著書晚下麒麟閣幼稚驕癡候門  
樂乃言物性不可違白鷗愁慕刷毛衣玉徽閉匣留為  
念六翮開籠任爾飛

下山歌

下嵩山兮多所思攜佳人兮步遲遲松間明月長如此  
君再遊兮復何時

近體詩

奉和立春日侍宴內出剪綵花應制

金閣妝仙杏瓊筵弄綺梅人間都未識天上忽先開蝶  
繞香絲住蜂憐艷粉迴今年春色早應為剪刀催

春日芙蓉園侍宴應制

芙蓉秦地沼盧橘漢家園谷轉斜盤徑川迴曲抱原風  
來花自舞春入鳥能言侍宴瑤池夕歸途騎吹繁

扈從登封途中作

帳殿鬱崔嵬仙遊實壯哉曉雲連幕捲夜火雜星回谷  
暗千旗出山鳴萬乘來扈從良可賦終乏揆天材

壽陽王花燭圖

一作沈  
佺期詩

仙媛乘龍日天孫捧雁來可憐桃李樹更繞鳳凰臺燭  
照香車入花臨寶扇開莫令銀箭曉為盡合歡杯

登總持寺閣

梵宇出三天登臨望八川開襟俯城闕揮手拂雲烟  
函谷青山外昆池落日邊東京楊柳陌少別已經年

江南曲

妾住越城南離居不自堪採花驚曙鳥摘葉餒春蠶  
懶結茱萸帶愁安玳瑁簪待君消瘦盡日暮碧江潭

陸渾山莊

歸來物外情負杖閱巖耕源水看花入幽林採藥行  
野人相問姓山鳥自呼名去去獨吾樂無能愧此生

江亭晚望

浩渺浸雲根煙嵐出遠村鳥歸沙有跡帆過浪無痕  
望

水知柔性看山欲斷魂縱情猶未已迴馬欲黃昏

使往天平軍馬約與陳子昂新鄉為期及還而不

相遇

入衛期之子吁嗟不少畱情人去何處淇水日悠悠  
恒碣青雲斷衡漳白露秋知君心許國不是愛封侯

送杜審言

卧病人事絕聞君萬里行河橋不相送江樹遠含情  
別路追孫楚維舟弔屈平可惜龍泉劍流落在豐城

留別之望舍弟

同氣有三人分飛在此晨西馳巴嶺徼東去洛陽濱  
強飲離前酒終傷別後神誰憐散花萼獨赴日南春

漢江宴別

漢廣不分天舟移杳若仙秋虹映晚日江鶴弄晴烟積  
水浮冠蓋遙風逐管絃嬉遊不可極留恨此山川

過蠻洞

越嶺千重合蠻谿十里斜竹迷樵子徑萍匝釣人家林  
暗交楓葉園香覆橘花誰憐在荒外孤賞足雲霞

泛鏡湖南谿

乘興入幽棲舟行日向低巖花候冬發谷鳥作春啼沓  
嶂開天小叢篁夾路迷猶聞可憐處更在若邪谿

途中寒食

馬上逢寒食愁中屬暮春可憐江浦望不見洛橋人北

極懷明主南溟作逐臣故園斷腸處日夜柳條新

宿清遠峽山寺

香岫懸金刹飛泉界石門空山惟習靜中夜寂無喧說  
法初聞鳥看心欲定猿寥寥隔塵市何異武陵源

題大庾嶺北驛

陽月南飛雁傳聞至此迴我行殊未已何日復歸來江  
靜潮初落林昏瘴不開明朝望鄉處應見隴頭梅

度大庾嶺

度嶺方辭國停軜一望家魂隨南翥鳥淚盡北枝花山  
雨初含霽江雲欲變霞但令歸有日不敢恨長沙

奉和晦日幸昆明池應制

春豫靈池會滄波帳殿開舟凌石鯨度槎拂斗牛迴節  
晦莫全落春遲柳暗催象溟看浴景燒劫辨沈灰鑄飲

周文樂汾歌漢武才不愁明月盡自有夜珠來

紀事云中  
宗正月晦

日幸昆明池賦詩群臣應制百餘篇帳殿前結綵樓命上官昭容選一首為新翻  
御製曲從臣悉集其下須臾紙落如飛惟沈宋二詩不下又移時一紙飛墜乃沈  
詩也及聞其評曰二詩工力悉敵沈詩落句云微臣雕朽質羞觀豫章材蓋  
詞氣已竭宋詩云不愁明月盡自有夜珠來猶健騫舉沈乃伏不敢復爭

奉和幸三會寺應制

傳是蒼頡  
造書臺

六飛迴玉輦雙樹謁金仙瑞鳥呈書字神龍吐浴泉淨  
心遙證果睿想獨超禪塔湧香花地山圍日月天梵音  
迎漏徹空樂倚雲懸今日登仁壽長看法鏡圓

奉和幸長安故城未央宮應制

漢王未息戰蕭相乃營宮壯麗一朝盡威靈千載空皇

明帳前跡置酒宴羣公寒輕綵仗外春發幔城中樂思  
迴斜日歌詞繼大風今朝天子貴不假叔孫通

春日鄭協律山亭陪宴餞鄭卿

同用樓字

潘園枕郊郭慶客坐相求尊酒東城外驂駢南陌頭池  
平分洛水林缺見嵩丘暗竹侵山徑垂楊拂妓樓彩雲  
歌處斷遲日舞前留此地何年別蘭房空自幽

和姚給事寓直之作

清論滿朝陽高才拜夕郎還從避馬路來接珥貂行寵  
就黃扉日威回白簡霜柏臺遷鳥茂蘭署得人芳禁靜  
鐘初徹更疎漏漸長曉河低武庫流火度文昌寓直恩  
微重乘秋藻翰揚暗投空欲報下調不成章

使過襄陽登鳳林寺閣

香閣臨清漢丹梯隱翠微林篁天際密人世谷中違苔  
石銜仙洞蓮舟泊釣磯山雲浮棟起江雨入庭飛信美  
雖南國嚴程限北歸幽尋不可再留步惜芳菲

下桂江龍目灘

停午出灘險輕舟容易前峯攢入雲樹崖噴落江泉巨  
石潛山怪深篁隱洞仙鳥遊谿寂寂猿嘯嶺娟娟揮袂  
日凡幾我行途已干暝投蒼梧郡愁枕白雲眠

登越王臺

江上越王臺登高望幾回南溟天外合北戶日邊開地  
濕煙常起山晴雨半來冬花採盧橘夏果摘楊梅跡類

虞翻枉人非賈誼才歸心不可見白髮重相催

早發始興江口至虛氏村作

候曉踰閩嶠乘春望越臺宿雲鵬際落殘月蚌中開薜  
荔搖青氣桄榔翳碧苔桂香多露浥石響細泉回抱葉  
元猿嘯啣花翡翠來南中雖可悅北思日悠哉鬢髮俄  
成素丹心已作灰何當首歸路行剪故園萊

發藤州

朝夕苦遄征孤鴻長自驚泛舟依鴈渚投館聽猿鳴石  
髮緣谿蔓林衣掃地輕雲峯刻不似苔蘚畫難成露裛  
千花氣泉和萬籟聲攀幽紅處歇躋險綠中行戀切芝  
蘭砌悲纏松柏瑩丹心江北死白髮嶺南生魑魅天邊

國窮愁海上城勞歌意無限今日為誰明

夜渡吳松江懷古

宿帆震澤口曉渡松江濱  
權發魚龍氣舟衝鴻雁羣  
寒潮頓覺滿暗浦稍將分  
氣出海生日光清湖起雲水鄉  
盡天衛嘆息為吳君謀士伏劍死至今悲所聞

遊禹穴迴出若邪

禹穴今朝到邪溪此路通著書聞太史鍊藥有仙翁  
鶴往籠猶掛龍飛劍已空石帆搖海上天鏡落湖中  
水底寒雲白山邊墜葉紅歸舟何慮晚日暮使樵風

靈隱寺

鷲嶺鬱岩堯龍宮鎖寂寥樓觀滄海日門對浙江潮  
桂

子月中落天香雲外飄捫蘿登塔遠剝木取泉遙  
霜薄花更發冰輕葉互凋  
夙齡尚遐異搜對滌煩囂待入天台路看余度石橋

紀事云之問貶黜放還至江南遊靈隱寺夜月極明長廊行吟曰鷲嶺鬱岩堯龍宮鎖寂寥久不能續有老僧點長明燈問曰少年夜久不寐何耶之問曰偶欲題此寺而興思不屬即曰何不云樓觀滄海日門對浙江潮之問愕然詢其適麗遲明更訪之則不復見寺僧有知者曰此駱賓王

早發韶州

炎徼行應盡迴瞻鄉路遙珠崖天外郡銅柱海南標  
日夜清明少春冬霧雨饒身經大火熱顏入瘴江消觸影  
含沙怒逢人女草搖露濃看莽溼風颯覺船飄直禦魑  
將魅寧論鴟與鴞虞翻思報國許靖願歸朝綠樹秦京  
道青雲洛水橋故園長在目魂去不須招

全唐詩錄卷第六 宋之問 詩



早入清遠峽

傳聞峽山好旭日棹前圻雨色搖丹嶂泉聲聒翠微兩  
巖天作帶萬壑樹披衣秋菊迎霜序春藤礙日暉翳潭  
花似織綠嶺竹成圍寂歷環沙浦葱蘢轉石磯露餘江  
未熱風落瘴初稀猿飲排虛上禽驚掠水飛榜童夷唱  
合樵女越吟歸良候斯為美邊愁自有違誰言望鄉國  
流涕失芳菲

發端州初入西江

問我將何去清晨泝越谿翠微懸宿雨丹壑飲晴霓樹  
影梢雲密藤陰覆水低潮回出浦駛洲轉望鄉迷人意  
長懷北江行日向西破顏看鵲喜拭淚聽猿啼骨肉初

分愛親朋忽解攜路遙魂欲斷身辱理能齊疇昔三山  
意於茲萬緒睽金陵有仙館即事尋丹梯

奉和春初幸太平公主南莊應制

青門路接鳳凰臺素澹宸遊龍騎來澗草自迎香輦合  
巖花應待御筵開文移北斗成天象酒近南山作壽杯  
此日侍臣將石去共歡明主賜金迴

嵩山石淙侍宴應制

得幽字

離宮秘苑勝瀛洲別有仙人洞壑幽巖邊樹色含風冷  
石上泉聲帶雨秋鳥向歌筵來度曲雲依帳殿結為樓  
微臣昔忝方明御今日還陪八駿遊

和趙貞外桂陽橋遇佳人

金華詩集卷第七

宋之問

卷之七

七

江雨朝飛浥細塵陽橋花柳不勝春金鞍白馬來從趙  
玉面紅粧本姓秦妒女猶憐鏡中髮侍兒堪感路傍人  
蕩舟為樂非吾事自嘆空閨夢寐頻

渡漢江

嶺外音書斷經冬復歷春近鄉情更怯不敢問來人

嵩山夜還

家住嵩山下好采舊山薇自省遊泉石何曾不夜歸

苑中遇雪應制

紫禁仙輿詰旦來青旂遙倚望春臺不知庭霰今朝落  
疑是林花昨夜開

送司馬道士遊天台

羽客笙歌此地違離筵數處白雲飛蓬萊闕下長相憶  
桐柏山頭去不歸

御定全唐詩錄卷第六

御定全唐詩錄卷第七

禮部侍郎臣徐倬翰林院侍讀學士臣徐元正奉

旨校刊

李元紘

元紘字大綱先居滑州占籍萬年本姓丙氏高祖  
義旗入關元紘曾祖祭率眾歸附賜姓李氏元紘  
性謹厚拜中書侍郎貴為國相家無儲積雖季文  
子之德何以加也卒謚文忠

近體詩

綠墀怨

征馬噪金珂嫖姚向北河綠苔行跡少紅粉淚痕多寶

金屋言金卷第十  
幄粘花絮銀箏覆網羅別君如昨日青海雁頻過

相思怨

望月思氛氲朱衾懶更薰春生翡翠帳花點石榴裙燕  
語時驚妾鶯啼轉憶君交河一萬里仍隔數重雲

徐安貞

安貞初名楚璧信安龍丘人尤善五言應制舉一  
歲三擢甲科歷中書舍人集賢院學士上每屬文  
多命視草累遷中書侍郎

近體詩

從駕溫泉宮

神女調溫液年年待聖人試開臨水殿來洗屬車塵暝

氣隨明主恩波浹近臣靈威自無極從此獻千春

書殿侍宴

校文常近日賜宴忽昇天酒正傳杯至饗人捧案前玉  
堦鳴溜水清閣引歸煙共惜芸香暮春風度幾年

送王判官

明月開三峽花源出五溪城池青壁裏煙火綠林西不  
畏王程促惟愁仙路迷巴東下歸棹莫待夜猿啼

送呂向補闕西岳勒碑

聖作西山頌君其出使年勒碑懸日月驅傳接雲烟寒  
盡函關路春歸洛水邊別離能幾許朝暮玉墀前

送丹陽採訪

郡縣分南國皇華出聖朝為憐鄉棹近不道使車遙舊  
俗吳三讓遺風漢六條願言除疾苦天子聽謳謠

奉和聖製畬二相出雀鼠谷

兩臣初入夢二月扈巡邊澗北寒猶在山南春半傳頌  
聲先奉御辰象復回天雲日明千里旌旗照一川柳陰  
低輦路草色變新田還望汾陽近宸遊自杳然

聞隣家理箏

北斗橫天夜欲闌愁人倚月思無端忽聞畫閣秦箏逸  
知是隣家趙女彈曲成虛憶青蛾歛調急遙憐玉指寒  
銀鎖重關聽未闌不如眠去夢中看

齊澣

澣字洗心定州人少以詞學稱弱冠登第景雲中  
為監察御史歷官至吏部侍郎以事貶良德丞累  
遷潤州刺史江南採訪後為平陽太守

古體詩

長門怨

熒熒孤思逼寂寂長門夜妾妒亦知非君恩那不惜攜  
琴就玉階調悲聲未諧將心託明月流影入君懷

常理

理爵里未詳

近體詩

古別離

君御狐白裘妾居絳綺幃粟鈿金夾膝花錯玉搔頭離  
別生庭草征衣斷戍樓蠨蛸網清曙菡萏落紅秋小膽  
空房怯長眉滿鏡愁為傳兒女意不用遠封侯

邢象玉

象玉爵里未詳

古體詩

古意

家中酒新熟園裏葉初榮  
佇杯欲取醉悒然思友生  
忽聞有奇客何姓復何名  
嗜酒陶彭澤能琴阮步兵  
何須問寒暑徑共坐山亭  
舉袂祛啼鳥揚巾掃落英  
心神無俗累歌詠有新聲  
新聲是何曲滄浪之水清

徐彥伯

彥伯名洪以字行兗州人少以文章擅名對策擢  
第累轉蒲州司兵參軍時司戶韋暉善判事司士  
李亘工於筆札彥伯文辭雅美時謂河東三絕神  
龍中預修武后實錄封高平縣子景雲中遷散騎  
常侍太子賓客昭文館學士

紀事云彥伯為文多變易求新以鳳閣為鸚閣龍  
門為虬戶金谷為銑谿玉山為瓊岳竹馬為篠驂  
月兔為魄兔後進效之謂之徐澀體

古體詩

擬古

遙裔烟嶼鴻雙影旦夕同交翰倚沙月和鳴弄江風  
若茂芳序君子從遠戎雲生陰海沒花落春潭空紅淚  
掩促柱錦衾羅薰籠自傷瓊草綠詎惜鉛粉紅裂帛附  
雙燕為予向遼東

讀書三十載馳騫周六經儒衣干時主忠策獻闕庭一  
朝奉休眄從容厠羣英束身趨建章秉筆坐承明解署  
相填噎僚吏紛縱橫五日休澣時屠蘇繞玉屏橘花覆  
北沼桂樹交西榮樹棲兩鴛鴦含春向我鳴皎潔綺羅  
豔便娟絲管清擾擾天地間出處各有情何必巖石下  
枯槁閒此生

顏光無淹晷逝水有迅流綠苔紛易歇紅顏不再求歌

笑當及春無令壯志秋弱年仕關輔篋門豁御溝敷愉  
東城際婉孌南陌頭荷花嬌綠水楊葉煖青樓中有綺  
羅人可憐名莫愁畫屏繞金膝珠簾懸玉鈎纖指調寶  
琴泠泠哀且柔贈君鴛鴦帶因以鸕鷀裘窗曉吟日坐  
閨夕秉燭遊無作北門客咄咄懷百憂

採蓮曲

妾家越水邊搖艇入江烟既見同心侶復采同心蓮折  
藕絲能脆開花葉正圓春歌弄明月歸棹落花前

芳樹

玉花珍簾上金縷畫屏開曉月憐箏柱春風憶鏡臺箏  
柱春風吹曉月芳樹落花朝暝歇藁砧刀頭未有期攀

條拭淚坐相思

近體詩

孤燭嘆

切切夜閨冷微微孤燭然玉盤紅淚滴金燼彩光圓  
手縫輕素嘖蛾續斷絃相思咽不語回向錦屏眠

春閨

戍客戍清波幽閨幽思多暗梁聞語燕夜燭見飛蛾  
寶鴨藏脂粉金屏綴綺羅裁衣卷紋素織錦度鳴梭  
有使通西極緘書寄北河年光只恐盡征戰莫蹉跎

郭元振

元振名振以字行魏州人舉進士授通泉尉累遷

涼州都督拓州境一千五百開置屯田盡水陸之  
利在涼五年夷夏畏慕睿宗即位徵拜吏兵二部  
尚書同中書門下三品以功封代國公明皇講武  
驪山坐於纛下流新州

紀事云元振尉通泉任俠使氣撥去小節武后知  
其所為召欲詰之既與語奇之索所為文章上寶  
劍篇后覽嘉歎示學士李嶠等

古體詩

春江曲

江水春沈沈上有雙竹林竹葉壞水色郎亦壞人心

王昭君



自嫁單于國長銜漢掖悲容顏日憔悴有甚畫圖時  
厭踐冰霜域嗟為邊塞人思從漠南獵一見漢家塵  
聞有南河信傳言殺畫師始知君念重更肯惜蛾眉

子夜四時歌

春歌

陌頭楊柳枝已被春風吹妾心正斷絕君懷那得知  
青樓含日光綠池起風色贈子同心花殷勤此何極

秋歌

邀歡空佇立望美頻迴顧何時復採菱江中密相遇  
辟惡茱萸囊延年菊花酒與子結綢繆丹心此何有

冬歌

北極嚴氣昇南至溫風謝調絲競短歌拂枕憐長夜  
帷橫雙翡翠被卷兩鴛鴦婉態不自得宛轉君王牀

寶劍篇

君不見昆吾鐵冶飛炎煙紅光紫氣俱赫然良工鍛鍊  
凡幾年鑄得寶劍名龍泉龍泉顏色如霜雪良工咨嗟  
歎奇絕琉璃玉匣吐蓮花錯縷金環映明月正逢天下  
無風塵幸得周防君子身精光黯黯青蛇色文章片片  
綠龜鱗非直結交游俠子亦曾親近英雄人何言中路  
遭棄捐零落漂淪古獄邊雖復塵埋無所用猶能夜夜  
氣衝天

近體詩

塞上

塞外虜塵飛頻年出武威死生隨玉劍辛苦向金微久  
戍人將老長征馬不肥仍聞酒泉郡已合數重圍

久戍人將老長

征馬不肥元振警句也元振嘗山居夜有人面如盤出燈下元振以此詩題其頰遂滅明日出行巨木上有白耳此句在焉

劉禕之

禕之字希美晉陵人少與孟利貞高智周郭正一  
俱以文藻知名號為劉孟高郭上元中與元萬頃  
等偕召入禁中論次新書高宗又密令參決時政  
以分宰相之權時謂北門學士武后時為鳳閣侍  
郎

近體詩

九成宮初應詔

帝圃疏金闕仙臺駐玉鑾野分明鶯岫路接寶雞壇林  
樹千霜積仙宮四序寒蟬急知秋早鶯疎覺夏闌怡神  
紫氣外凝睇白雲端舜海詞波發空驚遊聖難

鄭愔

愔字文靖滄州人年十七進士擢第來俊臣羅織  
文狀皆愔草定張易之兄弟薦為殿中侍御史易  
之敗貶宣州司戶

近體詩

塞外

塞外蕭條望征人此路賒邊聲亂朔馬秋色引胡笳遙

嶂侵歸日長城帶晚霞斷蓬飛古戍連雁聚寒沙海暗  
雲無葉山春雪作花丈夫期報主萬里獨辭家  
荒壘三秋夕窮郊萬里平海陰凝獨樹日氣下連營戎  
旆霜旋重邊裘夜更輕將軍猶轉戰都尉不成名折柳  
悲春曲吹笳斷夜聲明年漢使返須築受降城

馬懷素

懷素字惟臣潤州人寓居江都師事李善博覽經  
史善屬文舉進士長安中為監察御史守法不阿  
李迥秀恃勢納賄懷素劾罷之累拜中書舍人開  
元初為戶部侍郎封常山縣公三遷秘書監兼昭  
文館學士淡為明皇所禮卒謚曰文

近體詩

奉和人日讌大明宮恩賜綵縷人勝應制

萬宇千門平旦開天容辰象列昭回三陽候節金為勝  
百福迎祥玉作杯就暖風光偏著柳辭寒雪影半藏梅  
何幸得參詞賦職自憐終乏馬卿才

奉和幸安樂公主山莊應制

主家臺沼勝平陽帝幸歡娛樂未央掩映瑠窗交極浦  
參差繡戶繞迴塘泉聲百處傳歌曲樹影千重對舞行  
聖酒一霑何以報唯欣頌德奉時康

趙冬曦

冬曦定州鼓城人擢第拜左拾遺神龍初上言古

律條目千餘開元初為監察御史坐事流岳州還  
知史館歷官國子祭酒性放達不屑世事兄弟皆  
顯官張說云韋趙兄弟人之杞梓

古體詩

奉和張燕公早霽南樓

方曙躋南樓凭軒肆遐矚物華蕩暄氣春景媚晴旭川  
霽湘山孤林芳楚郊縟列巖重疊翠遠岸逶迤綠風帆  
摩天垠魚艇散灣曲鴻歸鶴舞送猿叫鶯聲續群動皆  
熙熙噫予獨羈束常欽才子意忌鵬傷蹠跼雅尚騷人  
文懷沙何迫促未知二賢意去矣從所欲

近體詩

和尹忭秋夜遊澠湖

政理常多暇方舟此汭洄吹笙虛洞答舉楫便風催山  
暗雲猶辨潭幽月稍來清谿無數曲未盡莫先迴  
烟靄夕微蒙幽灣賞未窮艤舟待初月褰幌招遠風鶴  
聲聒前浦漁火明暗叢東山雲壑意不謂爾來同

陪燕公遊澠湖上寺

江外多山水招要步馬來琴將天籟合酒共鳥歌催巖  
坐攀紅藥谿行屐綠苔所懷非此地遊望亦徘徊

奉答燕公

語別意淒淒零陵湘水西佳人金谷返愛子洞庭迷舊  
館逢花發他山值鳥啼江天千里望誰見綠蘋齊

奉和聖製同二相以下羣官樂遊園宴  
爽塏三秦地芳華二月初  
醴承奠璧罷宴是合錢餘柳  
翠垂堪結桃紅卷欲舒  
從容會鵷鷺延曼戲龍魚  
喜氣流雲物歡聲浹里閭  
聖恩將報厚請述記言書

盧從愿

從愿字子龔相州人弱冠舉明經授夏縣尉遷監察御史睿宗朝拜吏部侍郎高宗時裴行儉馬戴為吏部稱職及是從愿與李朝隱同時典選亦有美譽時人稱曰前有馬裴後有盧李開元中遷中書侍郎後拜吏部尚書謚曰文

近體詩

奉和聖製送張說巡邊

上將發文昌中軍靜朔方  
占星引旌節擇日拜壇場  
禮樂臨軒送威聲出塞揚  
安邊俟帷幄制勝在巖廊  
作鼓將軍氣投醪壯士觴  
戒途遵六月離贈動三光  
槐路清梅暑蘅臯起麥涼  
持文仰雄伯耀武震遐荒  
衽席知無戰兵戈示不忘  
佇聞歌杖杜凱入繫名王

盧鴻

舊唐書作盧鴻一

鴻字顥然其先范陽人徙洛陽博學善篆籀盧嵩山開元初徵至東都謁見不拜宰相遣問狀答曰禮者忠信之薄臣敢以忠信見召升內殿拜諫議大夫固辭詔許還山歲給米絹又賜隱居服官營

草堂恩禮殊渥

古體詩

嵩山十志 并序

草堂

草堂者蓋因自然之谿阜前當墉洫資人力之  
 締構後加茅茨將以避燥濕成棟宇之用昭簡  
 易叶乾坤之德道可容膝休閒谷神同道此其  
 所貴也及靡者居之則妄為剪飾失天理矣  
 山為宅兮草為堂芝蘭兮葯房羅薜蘿兮拍薜荔荃壁  
 兮蘭砌薜蘿薜荔兮成草堂陰陰邃兮馥馥香中有人  
 兮信宜常讀金書兮飲玉漿童顏幽操兮不易長

倒景臺

倒景臺者蓋太室南麓天門右崖傑峯如臺氣  
 凌倒景登路有三處可憩或曰三休臺可以邀  
 馭風之客會絕塵之子超逸真盪遐襟此其所  
 絕也及世人登焉則魂散神越目極心傷矣  
 天門豁兮僊臺聳傑屹崒兮零瀕湧窮三休兮曠一觀  
 忽若登崑崙兮中期汗漫仙聳天開兮倒景臺瀟灑氣  
 兮軼囂埃皎皎之子兮自獨立雲可朋兮赧可吸曾何  
 榮辱之所及

樾館

樾館者蓋即林取材基巔柘架茅茨居不期逸

為不至勞清談娛賓斯為尚矣及盪者鄙其隘  
聞苟事宏涵垂其實矣

紫巖隈兮青磴側雲松煙蕙兮千古色芳蘿藤兮蔭蒙  
龍幽人構館兮在其中霍靡蒙龍兮開樾館卧風霄兮  
坐楮旦粵有賓兮時戾止樵蘇不爨兮清談已永歲終  
朝兮常若此

枕烟庭

枕烟庭者蓋特峯秀起意若枕烟祕庭凝虛宵  
若仙會即揚雄所謂爰靜神游之庭是也可以  
超絕紛世永潔精神矣及機士登焉則寥閬  
恍愁懷情累矣

臨泱泱兮背青熒吐雲烟兮合宵冥悅歛翁兮杳幽靄  
意縹緲兮群仙會宵冥仙會兮枕煙庭竦魂形兮凝視  
聽聞夫至誠必感兮祈此巔契顥氣養丹田終彷彿兮  
覲靈仙

雲錦淙

雲錦淙者蓋激湍衝攢傾石叢倚鳴湍疊濯噴  
若雷風詭輝分麗煥若雲錦可以瑩發靈矚幽  
翫忘歸及匪士觀之則反曰寒泉傷玉趾矣  
水攢衝兮石叢聳煥雲錦兮噴洶湧苔駁犖兮草黃綠  
芳冪冪兮瀨濺濺石攢叢兮雲錦淙波連珠兮文沓峯  
有潔冥者媚此幽漱靈液兮樂天休實獲我心兮夫何

求

期仙磴

期仙磴者蓋危磴穹窿迴接雲路靈仙髣髴若  
可期及儒者毀所不見則黜之蓋疑冰之談信  
矣

霏微陰壑兮氣騰虹迤邐危磴兮上凌空青霞杪兮紫  
雲垂鸞歌鳳舞兮吹參差鸞歌鳳舞兮期仙磴鴻駕迎  
兮瑤華贈山中人兮好神仙想像聞此兮欲升烟鑄月  
煉液兮竚還年

滌煩磯

滌煩磯者蓋窮谷峻崖發地盤石飛流攢激積

漱成渠澡性滌煩迴有幽致可為智者說難為  
俗人言

靈磯盤礴兮溜奔錯漱冷風兮鎮冥壑研苔滋兮泉珠  
潔一飲一憩兮氣想滅磷漣清淬兮滌煩磯靈仙境兮  
仁智歸中有琴兮微以玉莪莪湯湯兮彈此曲寄聲知  
音兮同所欲

羃翠庭

羃翠庭者蓋崖巘積陰林蘿杳翠其上繇羃其  
下淡湛可以王神可以冥道矣及喧者遊之則  
酣謔永日汨清薄厚

青崖陰兮月澗曲重幽疊邃兮隱淪躅草拊綿羃兮翠



蒙龍當其無兮庭在中當無有用兮羃翠庭神可谷兮  
道可冥有幽人兮張素琴白玉徽兮綠水陰德之惜兮  
澹多心

洞元室

洞元室者蓋因巖作室即理談元室返自然元  
斯洞矣及邪者居之則假容竊吹妄作虛誕竟  
以盜言

嵐氣肅兮巖翠冥空陰虛兮戶芳迎披蕙帳兮促蘿筵  
談空空兮覈元元蕙帳蘿筵兮洞元室祕而幽兮真可  
吉返自然兮道可冥繹妙思兮草元經結幽門兮在黃  
庭

金碧潭

金碧潭者蓋水潔石鮮光涵金碧崑葩林蔦有  
助芳陰鑿洞虛 道斯勝矣而世生纏乎利害  
則未暇遊之

水碧色兮石金光灑熠熠兮澗湟湟泉葩映兮煙蔦臨  
紅灼灼兮翠陰陰翠相鮮兮金碧潭霜天洞兮烟景涵  
有幽人兮好冥絕炳其煥兮凝其潔悠悠千古兮長不  
滅

御定全唐詩錄卷第七

全唐詩話卷之十  
三



